



# CHURCH

## Bulletin

OCTOBER - DECEMBER 2019 VOL. XXXVIII, IV



KIN O KIN  
TSÜNGDA  
TEMEIMTEP

Kohima Ao Baptist Church



TEINTET ROGO 2019

# *-Keta alibatem-*

Yim O  
Pastor Sangdong

1. Kin O Kin Tsüngda Temeimtep	:	Mr. Bendangsashi Walling	7
2. Taküm Khristmas Yabo Balaka Asütsü Asü?: Mr. Sentilong Ozüküm	:		15
3. Tematiba Temeim Otsü	:	Mr. S. N. Among Jamir	19
4. Tebang Liliba Nungi Anisüngzük	:	Mr. Tiatoshi Longkümer	25
5. Sabi-ji Tanelä Temeshi Tashi	:	Mrs. Temsüla Lkr	33
6. Tepelatsü Osang	:	Rev. A. Chuba Jamir	38
7. KABA Neighbourhood Fellowship Osang : Mr. O. Sashi Ozüküm	:		41
8. Osangtem			
i. Arago General	:	Mr. A. Moa Longchar	46
ii. JMC	:	Mr. Lipokzülü	60
iii. Music Ministry	:	Ms. Amongbi Jamir	63
iv. Youth Ministry	:	Mr. Arep Tzüdir	67
v. Christian Education Ministry	:	Mrs. Alice Walling	72
vi. Arogotsü	:	Rev. Yashila Jamir	77

## **Editorial Board**

Ms. Anenla Jamir (Editor) :	8119886963
Mr. Bendangsashi	: 9774934997
Mr. Kikalemba	: 9436400375
Mr. S. Toshitemüsü Jamir	: 9436074317
Mrs. Alice Walling	: 9436607475
Mr. O. Sashi Ozukum	: 7005614775

# Tsüngremi temenen sempar saka temenenpur meimer



Mrs. Alice Walling

*'Kechiyong Tsüngremi alima odang meim nung Pai pei ajaso Chir agütsü' (Yohan 3:16).*

*Nisung kari ni meimra nia meyiper parnok meimer. Aji temela. Saka aji chichiba temeim masü. Asenok dang ajunger dang tang temeim sayubaji temeim masü. Tsükchir danga meimtetba temeimji chichiba temeim. Süra ya koda, kong nungi? Tanü temeim agi onsara anünga aliba líma ka nung asenok alir. Kin kidong balala, nübur tsüngda temeimtep koda renloka ayimsünga aotsü? Ya angatetdi. Asenoki memeimdang Tsüngremi asenok odang meim. Iba temeim ya asenoki meyipba magütsüakasa Paibo odang meimer.*

*'Tsüngremi alima odang meim'* Meimchir ajungba agi Tsüngremi meim masü saka Pa yimlibilem temeim Tsüngrem. Meimchir pelaa alitsü Tsüngrem tejangraba. Tsüngremi temenen sempar saka temenenpur meimer. Anungji odang meim.

**'Alima'** Alima tesem ka, nübur ka, kin ka masü saka alima nung aliba nübur ajak Pai meimer. Alimai a anema nokdak; merenshitsü talang. Saka Tsüngremibo anema nokdaker atema Pa ajaso chir asütsü yokba temeim ya koda!

- Alima ajunga merenshitsü langa liasü
- Meimchir ajunga teimlamekai liasü
- Meimchir dak malangba angati sempet ka Tsüngremi Pa ajaso chir yok
- Kangki nung timtemseta südaktsü
- Ya alima asoshi - 'nisung ajak asoshi tasüba Pai menakdang' (Ibri 2:9); 'Alima ajunga temenen asoshi asü' (1 Yohan 2:2).

**'Pai agütsü'** Ana asoshi ya malangba sempet. Tebui mulungbena meimchir teka nung asütsü yok. Taochi terakata mesayui Pa tepset. Aseni kua ta meshitsü metemsü.

**'Ajaso chir'** 'Aser Oji shi aküm aser taochi aser ochi agi sünge asenok rongnung ali'. Tematiba temeim indang aseni angatettsüji ya sir. Tsürabur asoshi pei chir ka dang aliba aibelen tulu aketba purtem asoshi asütsü bendanga agütsüba ama sir. Süra kodasür iba temoatsü agirtem, anati iba ama temeim mesayutettsü? Iba ama tarokba aser tesüngmangtsü temeim anati kong angutsü? Tsüngrem nisung kümer alimai kinü ka ama aruba mungpo ka nung iba temeim tajungba nung angateta benshitsü Tsüngrem dang taochi meshidi. Iba temeimi anünga aliba aser temeim ya koda tesüngmangtsü Ocet zülur balalai zülua sir. Iba temeim asen taküm nung jungkai adokdaktsütsü amanga iba Bulletin adoktsür. Tsüngremi tazünger ajak madak yamaji atalokdakjangma.

# Pastor menden nungi



Rev. M. Asangba Longkumer

2019 küm omen “*Kati ka den meimtepang*” ta asen Arogo yinti-i mulunga agizüker, iba tangatetba nung rangloker amangba purtem ajaki sarasadema, Arogo purtem rongnung süshia, lokti balala nung süshia, kiyong kinar den süshia, office nung süshia, meimtepa alitsü angazüka, temoatsü agia aruogo ta amanger.

Küm piyong Tsüngremi len anir aruba bilemteta Tsüngrem nem tenüngsang agütsür. Kibong kar nungbo tasüba khuret ajurua item taku maroktem ajemba mapanga ajuruogo. Alima tsütsü nungi bilemra kangasa khuret tulu benogo. Saka item mapang tem ajak nung Tsüngremi ner kibong mesentoki, metoktsüi nüka liogo. “*Ajemajema liang aser ni Tsüngrem ta metetang*” T.Ken 46:10. Item tia ajak nung Tsüngremi asen kibong metoktsü ta angateta Tsüngrem temeim bilemteta iba küm ya süia odaktsüdi.

*Kibong kar nungbo tashidak tulu agi mesüra khuret tulu arua amang agi nempang ama ajurua aruogo südi. Saka item khuret ajak ajurudang, aser abendang asen kisüng masü Tsüngrem ner kibong nung, nü taküm nung teti dena liasü ta angatetdi.*

*Mary Stevensoni* pungmang ka angu aser iba pungmang nung lisem lima nung nisung ana jajaba tsüngnep angu. Aser iba tsüngnepji la aser Yisu tena jajaba tsüngnep liasü. Lemang ajung dangbo Yisu tena jajaba tsüngnepji angur. Aser kodang lemang majung ana mejajateter idangjibo nisung ka tsüngnep dang angur. Anungji lai Yisu dang ashi, kechiba lemang ajungdangbo ana küleme jajar aser lemang majungdangbo ni dang jajadaktsür? Idangji Yisui la dang langzü! Mary lemang ajungdangbo ana küleme jajar aser lemang majungdangbo na yirua lir ta ser ni na ajungadokba agi nai kü tsüngnep dang angur ta langzü.

Temeim amangba purtem Mary Stevenson dang ashiba ama, timtem tushi balala ajurudang Tsüngremi kodanga na kija medoktsü, Pai na ajunger aruogo ta angateta Tsüngrem nem tenüngsang agütsüdi. Kechiaser Tsüngrem tajung lir. Pai na kodanga kija azüngmeyaka metoktsür.

*Kibong aika nung Tsüngremer temoatsütem balala mezüngdangmai agia aruogo, ibaji ana ajungba agi masü saka Tsüngremi ner kibong metemoka meimba temaitsü lir. Anungji item temoatsü ajak asoshi Tsüngrem nem tenüngsang agütsüdi, aser Pa tali meimtsü angazükdi, aser iba temeim jaki asen meküta aliba den meimteptsü ajungshir.*

*Joko Christmas mongpu tonga aruogo. Alima ajak nung pelateper aser Christmas amongtsü yongyaseta renemer. Israel nungeri Messiah alimai arutsü kangasa yongyaa ata. Chubatemi par chuba yimli nung meren merena asotsü ta bilem südi.*

*Israel tsür tasüngtet aikati Messiaji la ajanga asotsü yongyaa ata südi. Kodang Messiahji sodir tsükçhir ajak makdoktsü, yimli tasen ka nung yimsüsüba menden balaka nung ajungketer yimsü asütsü yangayaseta ata südi. Saka Israel nungeri bilemba ama maru. Anungji parnoki Christmas-ji majuru aser mongui süidaktsü.*

*Temeim amangbapurtem 2019 küm Christmas na aser ner kibonga koma amongtsü renemer? Israel nungeri yongyaa ata, saka manguba ama masütsü kanga sarasadema renemdi. Christmas-ji tamaren chuba menden nungi marur, tashitemetet agi marur, taka shisangba agi marur, benjongbentsü longsoteba agi marur, alima nung yimjung otsü jembitepba agi marur. Saka kija taküm nung ajemalua kümer, Tsüngrem bushia pei tashimait temenen tem nangzüka, Tsüngrem nungi tatok meshia, nü mulungjang nung Yisu Khristaji aitdakja iba tepelaji nai ajangshirapangla 2019 Christmasji na asoshi temoatsütiba Christmas, aser tepela tesünep yimjung alima dangi bener aruba temoatsüji nai agitsü. Anungji taküm küm na asoshi Christmas-ji temoatsü anguba Christmas ka asütsü ayongzüker. Tsüngremi na aser ner kibong maoajangma.*

# Kin O Kin *Tsüngda* Temeimtep

Mr. Bendangsashi Walling



*“The Church is the church only when it exists for others. The Church must share in the secular problems of ordinary human life not dominating, but helpful and serving.”*  
Dietrich Bonhoeffer

Tribe ta asüba O long ya asen Ao oshi nung Kin ta angateter.<sup>1</sup> Kin mesüra kidong ya tangatetba kasa lir. Asenoki metetdi-Kin kaji azü nungi sendaktepba aruba tetsü-tebou kibong ka nungi lir.<sup>2</sup> Ano iba ya temeja kidong ka koba akhidang tar nunger otsü tetsü-tebou mapang oshioben ka, tangatetba ka, sobaliba ka, aser libaliruyim ka nung külemi lia arur senshiba tang koba yimtsüng balala nung alir.<sup>3</sup> Anungji, Kin mesüra kidong ya kibong ka nungi jakzükba aser prokshia aoba ta angateter.

<sup>1</sup> Renty Keitzar, *Ao Dictionary: Ao to English and English to Ao* (Nagaland: Ao Theological Literature Society, 1999), 171.

<sup>2</sup> E.W. Clark, *Ao Naga Dictionary* (Calcutta: Baptist Mission Press, 1911), 301.

<sup>3</sup> E.W. Clark, *Ao Naga ...*, 301.

Merriam Webster Dictionary i kin ta asüba teratet agütsübaji, “iba ya lokti ka nung aliba telok koba putu aika külemi kibong ka, aser kidong ka, kati ka dak metaloka aser angazüktepa lia aruba.” Ano Collins English Dictionary ratettsübaji, “Kin ka ya kong oshioben ka, jenjang ka, aser tangatetba ka nung külem aliba meimchir telok ka ta angatettsü akok.” Anungji, Kin ka ya tetenzükbaji kibong tilatiba ka nungi jakzüka aruba koba lokti tuluba küma prokshir.

### **NEI shisadangba:**

North East India (NEI) nung kin o kin tsüngda mapang shia mangatettep ataloka arur, iba indang asenoki tensa mapang balala telemsa den apet reprangdangdi. India nung iba North Eastern tesem ya China, Nepal, Bhutan, Myanmar aser Bangladeshtem den arrtsü lir. Koba nung state ti lir itemji; Nagaland, Mizoram, Arunachal Pradesh, Sikkim, Assam, Manipur, Meghalaya aser Tripura.<sup>4</sup> Iba tesemtem nung ya Kin tapensa aliba telok koba Tibeto-Burmese, Proto-Austrioloids aser Indo-Mongloids tem nungi jakzüka aruba tem lir.<sup>5</sup> Anthropologist-temi ashiba agi item nisungtem ya alima nung tangar ka küboki melutetba kin ta ashir. Aser item Kintemji Mizo, Naga, Khasi, Jaintia, Garo, Bodo, Deori, Adi aser Nyishi kübokjia ano kin telemsa aika angutsü.<sup>6</sup>

---

<sup>4</sup> *Inter National borders of North Eastern States will be Fenced to Check Trans-Border Movement*, <https://www.firstpost.com/india/international-borders-of-north-eastern-states-will-be-fenced-to-check-trans-border-movement-2854568.html> (27, 10, 2019)

<sup>5</sup> U.A. Shimray, “Socio-Political Unrest in the Region Called North East India,” *Economic and Political Weekly XXXIX/ 42* (oct. 16-22, 2004): 4637.

<sup>6</sup> *Tribal People of North Eastern India*, <https://www.encyclopedia.com/international/encyclopedia-of-politics-and-society-a-to-m/nacs-transcripts-and-maps/tribal-peoples-eastern-india> (27, 10, 2019)

NEI Kintem ya sobaliba nung kang akanga aliba koba tejen libaliro nung takar, oshioben, sobaliba, sobu solemtsü, naroküm, chiyungtsü, külemküja aser ochi metetba lir. Yimsü tajung benshiba yimyatem ya kin shia balala lir. Iba ama telemsa aliba ya ajanga khen khenbo mangatettep adokdaktsür aser tangar dang nungi pei kinji tajungba aser tuluba ta bilemba ajanga Kin tsüngda rarapangsen aser mangatettep tali adoker.

**Kin O Kin tsüngda Mangatettep aser Rarapangsen:** 1990's nungi danga tenzüka reprangra, kin o kin tsüngda tsükchitepba aser rarapangsen aika adoka arur - Naga aser Kuki tsüngda, Chakmas, Hajongs, Arunachal nung aliba Tebitan nunger tsüngda, Hmar aser Thadou, Paite aser Thadou Manipur nung, Hmar aser Mizo, Bru aser Mizo Mizoram nung, Hmar aser Dimasa North Cachar Hills nung, Karbi aser Khasi Megalaya aser Karbi aser Rengma tsüngda Karbianglong nung rara.<sup>7</sup> Iba yagi asenok dang NEI Kin tsüngda raraba aser mangatettep jangja sayur. Anungji, asenoki iba ya koma aser kechi ajanga tensa tamajung ya adoker lenmang kar nung bilemdangdi. India nunger nüjiso angudang Eastern Himalaya aser Indo-Mayanmar lushilen koba Bramaputra lenten lir iba nung states Assam, Arunachal Pradesh, Manipur, Mizoram, Tripura, Nagaland aser Maghalaya item tesemtem ya rongsenketzung tsütsü (Economic) aser ali lushi ka dang ama Indian sokari angatet. Iba tangatetba ya ajanga parnoki NEI Kin telemsa ya züba züba agi. Talisa, Indian sorkari NEI ta asüba ya parnok political aser yimsüsüba tsütsü ayongtsü (convenient) atema inyak. Indian sokar Tir lenisüba kübok NEI nung aliba tesemtem ajak tenüng ka kübok lungjemtsü asoshi 1972 nung North East Council tenzüktsü.<sup>8</sup>

<sup>7</sup> B.K. Roy Burman, "Whither North-East India?," *Mainstream* XLIII/52 (Dec.23, 2005): 23.

<sup>8</sup> U.A. Shimray, "Socio-Political Unrest in ..., 4637.

Yamaji süaka, NEI Kintem ya sobaliba takang aser libaliruyim , oshioben, sobu solemtsü aser külemküja kenyongi balala, saka India nungeri iba telemsaji mangatet aser parnok sokar tashi nung inyak. Koba agi tanü tashi NEI nung kin o kin tsüngda mapang talangka tsükchitepba aser mangatettep nung arur.

### **NEI nung Kintem Tia**

Jangratemtsü kaji NEI nung aliba kintem ya pei pei ali, arem arrtsü tasazük tejangja kar. Kin shia pei pei tentettem/ telungjem lir tatishitsü agi Naga Hoho, aser tilaba agi Aor Telungjem/ Kaketsir Telungjem yamaji tanger kin Khasi, Garo, Manipurtema pei sasep nung telungjem lir. Aser tanübo NEI nung pei pei kin saseb nüjiso bushirtema tenteta lir (insurgent). Anungji kodang kin o kin na tsüngda rara adokdir insurgent-tem densema rara.<sup>9</sup> Item ya ajanga kin o kin tsüngda ji takoksa aser tesama tuluba ajangshir.

### **Naga Kintem lungjemshiba (Ecumenism)**

Nagaland nung Naga nunger kintem raraba jenjang aser tia reprangdangra, Naga nunger kin ter-trok sanger ka küma lungjemtsü atema putu aika mulungjemtetti aru. Saka kodang World War I raraba mapang nung British nungeri Naga nunger parnok meyirjang pezü nungi meyirjang pongu (4,000 to 5000) mapa inyakdaktsütsü (labour corps) France limai anir ao.<sup>10</sup> Iba ya Naga nunger asoshi tenük lapokba mapang ka liasü. Kechiyong parnoki tangar alima ajungba aser telungjem angu, koba ajanga parnok dangi temulungtetba ka aru aser parnoki pei sasa Naga nungerji shiba ta bushidangtsü tenzük. Anungji kodang parnok Naga limai meyipa aru, 1918 nung Naga nunger ajak asoshi Naga Club tenzük.<sup>11</sup> Ano külen reprangdangra Naga lima nung Khristan yimsü aruba ajanga Naga nungerji kin ka küma tali lungjemdaktsü. Tatishitsü agi, Naga nunger otsü nung yim yim alimai metetta ayimoktsüba kaji '*Nagaland for Christ*' Naga Lima Khrista Asoshi.

<sup>9</sup> U.A. Shimray, "Socio-Political Unrest in ..., 4637.

<sup>10</sup> Lintner, Great Game East India..., 57.

<sup>11</sup> Kaka D. Eralu, "The Fifty Four Years Indo Naga Conflict, A question of Internal India Ethnic Conflict or a Conflict Between Two Nation," in Coming Out of Violence, Essay on Ethnicity, Conflict Resolution and Peace Process in North East India, edited by MonirulHussain (New Delhi: Regency Publications, 2005), 181.

### **Tenokdangtsü adokdaktsüba:**

Tanü Naga nunger jenjang reprangdangra 93% dak talila Yisu dak amangertem lir. Saka kodang kin o kin, kidong o kidong, yim o yim anema apusodir, tamanger ka ama Khristian ayak mali akümer. Anungji Khrista azü dang nungibo pei kin azü jiang tongtibangba akümer. Aser iba ya kanga dang putepa L. Jayaseelan-i yamai zülua angur, ‘*Blood thicker than Baptismal water and Ethnicity stronger than the bond of faith that calls for forgiveness and reconciliation... Christianity is only a skin deep, faith has not sunk in*.<sup>12</sup>’ Aser aiben item amala timtem mesüra rrapangsenji lokti lenirtemi, tashi temetetertemi aser developing political elites who either ‘politicize the ethnicity’ or ‘ethnicize the politics’ for their economic and political gain and also sometimes towards ‘politicization of culture’ and elevation of cultural identity throughout political force, where the real essence of the cultural elements are hijacked by the ethno-politicism.

### **Lokti nung Arogo Ola (Church Voice in Public sphere):**

Khen mapang ka Ao Arogotem nung Pastor kar den asüngdangtepba jembia liasü, aser parnok aikati yamai langzü, ‘Election sülenbo tenzüker aikati tenzükba wadang nungi anener’, ta shia liasü. Kechiba ta süra parnoki iba election ya Tsüngrem O i teyuba ama ochi, yim-jung, tesünep nung agitsü mokokteter aser tamakok dang alur. Kodang election ta südir iba ya ochi mashi, meputep, tulu tila lemsaba, tetsübu, yi ajemba, mozü achiba, kin kidong bendangba, yamaji ano aika dang lir koba agi neburtem moksepaktsür. Aser lokti nung teraksa jenti lir, item tebilemtsüem züina liaka Arogoi nübur ola mangashir aser ola madoki terepranger ka amadang alir.

---

<sup>12</sup> L. Jayaseelan, “Conflict Situation in North-East India: The Church’s Response II,” VJTR 63/7 (July 1999): 506-507.

Item ajanga Khristan osang tajung ya lokti libaliru temelensi adokdaktsütsü nung kecha sendaktepba mali ama sayur. Aser iba tebendang ya asen Naga lokti nung kanga jangja angur. Shisadangra iba ya tamangba yimsü aser yimden yimsüsüba (Sacred and Secular) tsüngda talangka pilaa aliba ajanga lir ta angateter, aser iba tangatetba ya western shisadangren aser Theology nungi adok.<sup>13</sup> Arogo shilemji tanela jenjang anepalutsü atema dang lir ta angateter. Anungji, lokti teraksa nung shilem agia yanglushitsüji Arogo shilem masü ama bilemer. Aiben tamangertem temenen nungi pilar alitsü asoshi aser temeshi alitsü asoshi dang jembir (So called from the worldly things). Saka Tsüngremer sayatenya, jungkai adok, aser Pa temeimji bo iba alima lokti (Public sphere) nung ataloker, anungji lokti aser alima ajak ya Pai yangluba aser mepiadoktetba ka lir. Aseni iba ya piatokra aseni Tsüngremer sentong aser mapa sentoker ka akümtsü. Kodang KABA Faith Statement no. 8. ya ajidangdir, ‘*Onoki Khrista kulisüba, samaba tanelatem Pa dangi anir arutsüya kümzükba pur ajak teinyaktsü lir ta amanger. Onoki alima yimten aser lokti tentet tashi kechaia Arogo kaji arakmoktsü makok ta amanger. Arogo aser Yimten anaya temang balala, anungji kati ka madak tashi amshitsü makok. Saka pei sasa pei meten kechi timteinyaktsü ali aji angatettepa aser kati ka aküm tsübutepa Tsüngrem sentong atalokdaktsütsü ta agizüka amanger.*’<sup>14</sup> Iba tangatetba nungi ajemdaker Arogo kaji lokti (*public sphere*) teraksa nung aser yanglushiba nung tejangja ola alitsüla (*Prophetic voice*). Saka tanübo Arogo aser alima lokti tentet tetsüngda tulu kümadokba agi Arogo ola lokti nung makai akümer.

---

<sup>13</sup> There are quite number of literature, Rudolf Otto, *The Idea of the Holy* (1923); Max F. Scheler, *On the Eternal in Man* (1960); *The sacred and the Profane: The Nature of Religion* (1959).

<sup>14</sup> Inyakyim Leniba, (*Kohima: KohimaAo Baptist Arogo*, 2016), II.

**Alima lokti tentet nung Arogo aser tamanger Ola:**  
Shidaklen süang mesüra mashilen süang kira-longrar (*Ethno-National Movement, Insurgent*) parnokibo Khristan tamang dak ajemdaker parnok mapatem ajak nung sangdonger aser inyaker. Tatishitsü agi parnok aliba tesep nüngjatem nungi tenzüker Laishiba nungi agizüka tenüngetem amshiba angutsü (*Zion, Hebron, Gilgal, Hermon*)<sup>15</sup> aser Naga Socialist Council of Nagaland tetenzük sangtong nung yamai zülua angutsü (13 January 1980).<sup>16</sup>

*“Religion: we stand for the faith in God and the salvation of mankind in Jesus, the Christ alone that is ‘Nagaland for Christ’. However, the individual freedom of religion shall be safeguarded and the imposition of the faith on the others is strictly forbidden.”*<sup>17</sup>

‘Nagaland for Christ’ yim yim sangtong ajanga Naga Political Movement kübok Naga nunger aika lungjemdaktsü, aser Naga nungera kin ter-trok Ka küma lungjemdaktsübaji Khristan yimsü aruba ajanga lir. Anungji item tatalokba ajanga angatetba kaji Khristan tamangba yimsü ya tanela anepaluba tsütsülen dang masü saka alima lokti tentet (Public Sphere) nunga temelensi adokdaktsü tashi lir aser political agendatem atema nisungtem ka küma ayongdentsü tashi lir.

---

<sup>15</sup> M. Horam, *Naga Insurgency: The Last Thirty Years* (New Delhi: Cosmo Publications, 1988), 76-77

<sup>16</sup> Lintner, *Great Game East India...*, 90-92

<sup>17</sup> Chaise, *The Search for peace ...*, 501-505.

**Bonhoeffer i ashiba agi,**

*“The Church is the church only when it exists for others. The Church must share in the secular problems of ordinary human life not dominating, but helpful and serving.”<sup>18</sup>*

Tsüngrem temeimji meimchir ajaki angutsüsa Kalvary Kangki tenem nung jungki adokdaktsü. Tanüa iba kasa temeimji memelensi lir aser koba temeimi takar sensaker, tanak temesüng, tulur tilar, aser kin o kin mebendanger, saka ajak asoshi kasa aser kecha sotta meyu-i meimer. Anungji tanü Arogo kaji alima lokti tentet nung iba temeimji bener shilem agia, teraksaji yanglutsü renemtsüla. Iba ya ajanga kin o kin tsüngta temeimtep koba tamakoktsü ka ama lir ibaji takoktsü küma inyaktettsü.



---

<sup>18</sup> Dietrich Bonhoeffer, *Letters and Papers from Prison*, 3rd enlarged ed. (London: SCM, 1971), 382.

# TAKÜM

# *Khristmas*

## *yabo balaka asütsü asü?*

Mr. Sentilong Ozüküm

Ashiko, na iba kaket azüngtsü mapang mali. Joko Khristmas atongtsü hopta ishika dang züngdangteta lir aser teinyaktsü mapatem jenti lir. Hau, December ita ya kanga dang mazüngba ita ka lir. Teinyaktsü mapa jenti adoker. Keyir benjong, lokti mapa aser sentep balala nung ne nübu aser mapang nüngdaker. Tenzükba wadang balala nunga küm mesüidangsa atemtsü mapatem inyakteper. ‘Oda December ita yabo anogo nung ghonda 40 alinungbo kangasa jungla’ ta aiben asenoki nemjema bilemer. Anungji asenok aikati noksa ka ana ajirbo iba kaket ya kodanga bener marutsüba ondaka ayutsü. Anogo ishika tsüngda nung asen kümtetdakba Yisu Khrista alimai aruba agizüktsü asoshi nüburtem terenemba tulu tenzüktsü. Aso tulu Benjong tebu yangluteptsü, shishi-lembaba tesem nung benjong tesangwa remshiba aser sentsüberang petinutem alitsü aser asen kiojen okteta merükmejutsü. Aser yamaji asenok mazüngi dang lia, memeteti Khristmas arutsü, oadoktsü aser Küm Tasen mopungsem agi onshitsütsü. Ne taküm nunga

Khristmas benjong aika ajurua aruogo. Taküm Khristmaah koma suidaktsütsü? Tesüiba küm amato dang mopung nungdang süidaktsütsü asüng, yimya tasen ka nung amungtsü bilemdar? Ne ket nung minute pongu danga mapang talila lira, arung külemi yimti tejen Bethlehem bushia khen semdangti. Nashi kidang jagi yidi aser tsük mejakdak su anasa mapang tatsüka atapisüa lidi. Mezüng Khristmas nung atalokbatem khen meyiba repranga bilemdangdi. Junga reprangang. Shibai metet, nai ne taküm piyong bushiba rongsenji angutsü.

### **Herod Chuba-i inyakbatemji khen bilemdangdi.**

Laishibai ashir, Yisu Khrista asoba osang angashia Herod Chuba kangadang tipmetemteti shisabulu. Bethlehem aser temeket tesem ajak nung kinü tanur meyirjangsa aika tepseta intok. Aji dang masü, süiren otsü zürürtem-i ashiba agi, Herod Chuba-i par chirnur, kinungtsü aser pa asola tetsü densema pa yimli nung senmangtsüpurtem ajak tepseta ao. Pai kechiba iba ya inyak? Kechiaser Yisui pa melen yimsü asütsü ta bilem. Herod Chubai inyakba mapatem yabo tamangtsü maka ta nai bilemra, tanaben bilemdangang. Asenoka Herod ama masü na? Asenok nisung shiai pei sasa yimsü sünüba nije yimli tilala kaka lir. Asen taküm Khrista nem bendanga magütsütetba kuliji ibai masü no? Kodang asen yimlii Chuba tasen ka arudir, Pai asen taküm aser aseni meima sapubatem anokshitsütsü ta asenoki tsübua arendaker.

### **Mezüng Khristmas majuruba nüburtemji bilemdangdi.**

Yirusalem yimti aser temeket nung alir ajaki süiren otsü nung mezüngbuba Khristmasji majurushi. Yisu asoba

mapang alima nung Yirusalem ya tamangba yimsü nung tanüler yimtiba liasü. Bethlehem ya Yirusalem nungi mile trok shi dang pila-a orr lir. Tamanger, putir aser yimden yimsüsürtem ajak Yirusalem yimti nung aden-shia liasü. Parnoki tezüluba shin O kakettem zünge meteta lir. Khrista asoba meketa temaitsü adokbatem parnoki meteta lir. Ajioda süaka, parnok ajaki mezüng-buba Khristmasji majurushi. Parnok anisüngzüka aliba kidang nungi tetsüngda tatsüka dang pilaa orr tesüngjem tesem ka nung Alima Chuba soa lir ta parnoki memetet. Koda tesasatsü. Asenoki khen ochishia bilemdangdi. Asenok ajaki küm ka nungi küm ka, Khristmas-sa Khristmas majurushir masü no? Naia ne taküm nung Khristmas kwiben majurushi? Aseni benjong nung Pa mejaoki, putusa putu Yisu asoba benjongmung amungbaji khenyongi tetezü maka masü na? Taküma koma asütsü? Asenoki ano Khristmas ka majurushii süitemtsü asü? Shisa kadi. Pa ajurutsübaji sarasadem ka agi dang pilaa lir.

### **Tashitemetertemi kinü Yisu nem bener arütsüba senpettem bilemdangdi.**

Hon, Liangmesen aser Teronem menemba totzü.

Item indang tetezü aser temaitsü taroktibatem makaba mali. Hon ya Tamaren Yimsüsür temaitsü. Yisuji chubatem madak Chuba. Liangmesen ya par yimsü nung tenlakidang Tsüngrem külemdang amshi. Yisuji Tsüngrem meimchir kümer alimai aru. Teronem menemba totzü ya nisung tasümang nung mezütsüba süngomozü ka liasü. Yisuji tekümküker, shiba alima nung taküm alitsü asoshi masü saka ali meimchirtem menen alangzüka taküm bendanga agütsütsü aru.

Süra, asenoki iba Khristmas nung Yisu nem kechi senpet bener arutsü? Ibai Pa asoba anogo lir. Iba alima nung aliba ajak ya Yisu meyong ta shisadangdang, Yisu nem senpet ka agütsütsü bilemdangtsüjibo kangasa tasak lir. Ajioda süaka Yisu meyong masüba senpet ka bentsü nung koda? Pa asoba benjong nung asen mulungjang aser taküm rangben Yisu nem agütsünungbo koda kotak nung benjong tulu alitsü? Khen shisadangdi.

**Tatemsa, Bethlehem nung Nashi kiji bilemdangdi.**  
Nashi aser Gadotem ayudak. Tesembatsü shiruru janatem. Memerükba. Saka kechiba alima nung iba ya-ang ajaki apudaka akümtsübuba tesemji aküm? Kechiaser tsük mejakdak su nung Kinü tanur Yisu soa aliba ajanga lir. Shibai metet tang asen takümja Bethlehem nung nashi ki ama alitsü südi. Tesem kar nung tazü, külen teshinem. Jana rüja memerük, menüngdakba. Shibai metet tang asen limajia Bethlehem ama asütsü südi. Nütsüng onsara aser temekong. Arung asenok-i munü-ji tsük mejakdak su nung lemdi aser iba Khristmas nung asen taküm nashiki nung Yisu sodaktsüdi. Kotak nung tsüngsanga pelateptsü aser aseni jaokba petinu tesangwa tilakaji yashidaktsüdi. Ibai Tesüngmangtsüka asütsü masü no?

Tsüngremi asenok rongnung ka aküm, süra asenokia Pa den ka kümtet. Ibaji Khristmas tenangzükba. Arungma, asen lima, asen mulungjang aser asen taküm nung asenok ajaki Pa aniomdi.

Khristmas tetezü kechi?

Khristmas tetezü nisung chirtem Tsüngrem chir kümdak-tsütsü asoshi Tsüngrem chir nisung chir akümba lir.

Süra, na iba Khristmas koma süidaktsütsü bilemer?

# Tematiba

## Temeim Otsü

(The Greatest Love Story)



Mr. S. N. Among Jamir

Okila

Ali pokli nungi Tsüngremi  
meimchir nem agütsüba  
sempettem rongnung  
tajungtibaji “temeim” lir.  
Lai O nung Tsüngremji  
temeim aser meimchirji Pa  
mesükba nung yanglu ta  
kuli tejanga angur (Lipok  
1:26). Iba tetezü, meim-  
chiri teyanglur Tsüngrem  
meyipa meimtsü aser “kati  
ka den meimteptsü”  
nükjidong nung yanglu  
(Yohan 13:34).

Meimtsü aser meimtepba ya Tsüngrem dak aketba tongtibangtiba ka (essence) meimchir nem apuoktsüba lir. Ashiko Tsüngrem mesükba nung meyanglu asübo meimchirji shiruru den kecha tepila makai pei teyanglur memeteti, kati ka den meimtettsü mokoki lila. Aroka shisadangra, meimchir asoshi temeimji kanga dang tongtibang lir, kechiyong taküm nung temeim endokra, taküm alibaji kecha tetezü maka. Kaket zülur Rick Warren-i ashir, “Taküm nung temeimji endokra, aji tazüngla” (Love minus love equals zero). Anungji, na aser ni iba alimai aruba nükjidongji asenok dak tasodang nungi keta aliba meimtsü aser meimtetba tashi keta aliba ajanga takümji tabensa kümdaktsür.

### **Mezüng Temeim Otsü (First Love Story)**

Alima nung tejentiba temeim otsüji Eden tsüki nung tenzük. Iba otsü tezülusangji asen Tsüngrem lir. Iba temeim otsüji mezüng tejak-shiyudang nungi meimadokba (love at first sight) liasü. Kodang Tsüngremi meimchir yanglu, Pai aji kanga junga angu aser mezüng yongi meimtepadok (Lipok 1:31). Tsüngremi meimchir Pa mesükba jenjang nung teyangluba ajak madak kibur kümdaktsü aser soyapokya jenti rena aotsü asoshi moatsü. Item temoatsü ajak asoshi Tsüngremi meimchir dang nungi akangba ajak agi Pa dang meyipa meimtsübaji liasü. Aji saka Tsüngrem aser meimchir tsüngda temeim nung kobi-melei tebilemtsü adok. Meimchiri parnok mezüng meimsang temeimji ashioktsü. Meimchiri aibelenba ajanga parnok mezüng meimsang tsüngda nung temulung melemtet adok.

Oda, Tsüngremi meimchirji kangasa meim nung, meimchiri aibelenaka, Tsüngremi Eden tsüki nung parnok bushia aru (Lipok 3:9). Saka meimchiri pei tai menangzükteti kati-ka nem tai tongloktsü nung, parnok Eden tsüki nungi aridok. Tsüngrem aser Pai mezüng meimba meimchirtem nungi temeimji talanga piladok. Asenoki aiben “Temeimji tenük tapok” (Love is blind) ta jembir, koba tetezü, chichiba temeim agi nisung ka dak tashi mait aser motokmeprritem liaka mangu ama odang meimba. Iba kasaji, Tsüngremi meimchir tsütsü temeim nung tenük apokba yong, meimchiri Tsüngrem temeim sendokaka Pai meimchir den tesendaktep raksaa alibaji yanglushitsü kangasa merang. Aji saka, mapang kabu Tsüngremi meimchir yungluba atema kanga dang nemjema jashia bilemba Lai nung angur (Lipok 6:6). Iba tashiji meimchirtemi inyakaka, Tsüngremi anosa tanaben meimchir Pa den temeim nung lungjemtsü tasa tajungtiba ka yanglua meimchir bushi. Tsüngremi iba temeim otsü nungji Pa akaba tajungtiba meimchir asoshi tenlatsü mulungtet. Lai O nung temeimi tenlabu (sacrifice) akhanger ta kuli agütsüba ama, Tsüngremi Pa ajaso Chir meimchir temeim meyipa koktettsü asoshi tenla ka ama alima dangi yok (1 Yohan 4:16; Efesa 5:2).

### **Yisu Tetemsü Temeimer (Jesus the Ideal Lover)**

Alima temeim otsütem nung Romeo aser Juliet, Jina aser Etiben indang otsü asenoki sapua jembir. Parnokji meimchir asoshi temeimer tatishitsü ka ama amshir. Saka parnok dang nungi temaba jenjang nung temeimer (lover) ka lir aser aji Tsüngrem Chir Yisu Khrista. Tsüngremi Eden tsüki nung tenzüka züluba temeim otsü nungji na aser ni tensema lir.

Alimaji jilushi sayuba sapang (theatre) ka ama, yangji ne otsüji anogoshi zülüa yanglua aor aser iba otsü nungji tongti sayarji (main character) na aser ni lir. Tsüngremi asenok meimchir tama meim yong Pai Pa chir iba temeimji mapa agi sayutsü aser asenok Pa meyong akümtsü nükjidong nung alimai aru.

Yisu alimai aruba kuli tulutibaji tanga kecha masü saka temeim liasü. Iba temeimi meimchir tsüngda temeimtep tapu ajak ajangdanger (transcends all types of love). Meimchir temeim agibo pei ajung dang asaa meimer, pei ajangzüktsü dang bushia meimer, pei nüngdak peritsü asoshi dang meimer, aser aiben nisung tashi mait repranga bendanga meimer. Saka Yisu temeim agibo asen tashi mait, tesüiba temenen mesüra motokmeperi kecha masadangi dang meimer. Tasüngdangba kecha makai, mokokachi kecha melii dang Yisui ne aser kü taküm jenjang kecha mesükshi meimer. Asenok dang nungi aginüba ajak agi Pa dang meyipa meimtsü Yisui yimla. Yisu temeimji tanga alima temeim dang nungi balaka lir kechiaser iba temeimi asenok mapa agi aatsü makokba “tekümtet” angati dang agütsür. Ano iba temeim dak aketba tajung kaji, iba temeimji lemsateptsü akoker aser iba temeimi pei asoshi kecha mepushir. Kodang iba temeim lemsatepba kati ka den meimteper, Tsüngrem temeim asenok dak tabensa akümer (1 Yohan 4: 12).

### **“Nai Ni meimer asü?” (Do you Love me?)**

Tsüngremi Eden tsüki nung tenzükba temeim otsüji na aser ni asoshi lir. Jilushi (drama) ka ama iba otsüji tanen maka iba lima nung asen taküm nung anogoshi zülüyonga aor. Otsü kaket züluri mesüra jilushi yangluri

tazünger aser teperanger jangratemdaktsütsü nukjidong nung otsü nungji tasa (plot) balala enoka meimchir tatalokba den metemdanga otsü/jilushiji yanglur. Iba kasaji asen taküm otsü nunga tensa, tia aser tatalokba balalatem (plot) ajurur aser item jagi iba temeim otsüji tabensaba kümdaktsür. Alima temeim otsütem nung lendong/timtem (tragedy/twist) majuruiang temeimteper tsüngda temeimji akangamekümtetba ama asen taküm otsü nunga Yisu temeimji tali tarokba nung angatettsü asoshi tatidang aser tensa balala asen taküm otsü nunga ajurur.

Meimchir asoshi sempet tulutibaji tetemsü temeimer Yisuji lir. Temeimer Yisuji Tsüngremi Eden tsüki nung tenzüka yutsüba temeim otsüji abensadaktsütsü meimchir ama küber alimai aru. Yisui alima nung alidang Yona chir Simon dang aseben tashi asüngdangba ama, tanü Yisui ne dang aser kü dang, “Nai Ni meimer asü?” ta asüngdanger (Yohan 21:15-17). Yisubo asenokji mezüng yongi meimatokogo, aser asenok den tesendaktep tajung yunür. Ne taküm temeim otsü nungji anogoshi na Yisu den jajar asü mesüra asen dang mezüng meimsang nungi na anosa maneni jenshir? Ne taküm otsü nungji naia kechi shilem agir? Iba temeim otsüji Tsüngremi tenzük saka iba otsüji koma tembangtsü – tepela/tejashi (happy or sad ending) ajibo ne dak aser kü dak keta lir. Temeim otsü ka tepela agi metempangra tazünger aser teprangertem jangramatemba ama kechi tensa tia ajuruaka asen taküm otsüji temeimer Yisu den tobur junga tempangtsüji asen taküm otsü tenzüksang Tsüngrem taginüba lir.

## O Tembang – Christmas Penzü!

Asenoki küm shia Christmas amungba temaitsüji iba tematiba temeim otsüya lir. Tetemsü temeimer Yisui asenok meimchir jenjang tashi nemzüka alua, na aser ni bushia aruba tepela anogoji ibai lir. Tsüngremi Eden tsüki nung “Na kong lir?” ta meimchir bushia tenzükba ama, tanü Pa asenok ama kümer na aser ni bushitsü arua lir. Asen tabensa temeimer Yisu ne taküm nungmekai lira, Pa dang meyipa meimtsü asen taküm renemshiti. Pa den na tesendaktep tajung lira iba temeimji alima den lemsatepba ajanga Yisu temeimji asen taküm nung tabensaba kümdaktsüti ta iba ocet azünge ajak ayongzüker.



*Tsüngrem ajaso Chir ajanga  
asenok taküm alitsü asoshi,  
Tsüngremi Pa alimai yok,  
idaki asenok dang Tsüngrem  
temeim jungkai adok.  
Asenoki Tsüngrem dang  
meim masü, saka Pai ang  
asenok dang meim, aser  
asen temenen atema  
takümtet tenla Pai Pei Chir  
yok, idaki temeim lir  
1 Yohan 4: 9 – 10.*

# **TEBANG LILIBA<sup>NUNGI</sup> ANISÜNGZÜK**

(Freedom from Gossiping)



*Mr. Tiefoshi Longkumer*

*Efesia 4: 29 – “Nenok bang nungi tamagitsü o kecha tatokdaktsü. Saka koba ajanga tangar taküm yangluloktsü atema tenüngdaktsü lir, oda tangashirtem nem taochi agütsütsü, itemji dang jembiang.”*

*Apijemtsü Shin 18: 8 – “Miim o jembir otemji bangnem tajung mesük, aser parnokji poknung leni air.”*

## **Okila:**

Asenok kwikati tezülen nungi aruba o ta metetsümonga ibaji odang osang tasen amai agizüka medemertem den lemsateper? Kwiben ne medemeri ne dang, “Shitakba-bo ni ya mashitsüla aser oda mejebinürako saka...” ta sûr tangar indang otsü ka ashiba lir?...Aser nai-a pai jembibaji nokdangtsü mesüra mangai toktsütsü melen, kanga jangraa angaa, ano taliang metettsü jangraba yimya benshir kwika lir? Ni bilem nung asenok aikati ibaji jangratsü.

## **Tebang Liliba ya kechi?**

Kiburi ashiba masü saka tezülen jembitepba telung o kar terara temloker angashia, ibaji osang tasen kümer jembiba dangji tebang liliba, gossip ta ajar.

Gossiping mesüdanger alima nung shinga mali. Nisung ajaki tezülen nungi aruba osang anganür aser tali temloka jembia kazüner. Oda khen-khenbo, kiburi mümshiba o kar, tangar ajanga angashidang ibaji ajanga tangar yaritsü lemanga lapoktsüba osanga akümer. Tat.agi, kiburi tangar nem timtem magütsünüba agi par shirangba osang shinga danga mashi. Saka tezülen nungi aji angashiba ajanga shiranger kibong semdangba mapangtema lir. Saka tangar ka indang, shitak asü tiyazü-ar junga mejangjai jembiba aser iba osangji kibur makai ratettsü merangba (to interpret) nungji lendong lir aser yamala mapa dangji tebang liliba ta ajar.

Tanü putu nung, gossip sütepba ya tejak o tejak na mechiteper jembiteper dang masü, saka social media aser newspaper ajak nung angur. Aser iba nungi kümdanga alitsü kanga tongtibang lir. Kechiyong, nai kechi angashir, azünger aser jembir iba lagi ne shisatsü yanglutsür, aser ne tangatetba aji akümer. Aser ne mapa ajakji ne shisatsü tangatetba lagi anitsü. *Your mindset will define your action.*

**Tebang liliba yimya nung ajaki amshiba yimya ana keta lir:**

Mezüngbuba nung, tebang liliba mapa ya metetteper o metetteper na tsüngda inyakba mapa ka lir. Tebang lilitsü atema parnok kati ka metettepa alitsüla, kechiaser liliba ya “meteta alir ka” indang osang talila agiba lir.

Tanabuba nung, liliba ya tangar taküm ka indang ratettsü merangba. Iba ya tajunga asütsü akok, tamajunga asütsü akok, saka iba ya kibur makai pa/la jakla o bendangtsü merangba lir.

Tebang liliba nung ya taküm aser tasü jenjanga sendaka lir. Tatshitsü aketba otsü kati ashiba agi, Rom yimsüsüba mapang, nuburtemi Syracuse chuba Dionysisus sashiba indang kanga jembi ta ashir. Teimba ka item lili otsü ya kuo mejepdak jembiteper. Anungji, yangji kuo mejeper lagi yamai ashi, “Dionysisus indang jembiba ya nibo nenok kanga aochia angar. Hopta shia pa tekong nung kü kotari ataloker teti alir nung koda? Pa taküm aginü nungbo pa kü ket nung lir,” Kodang chuba lagi iba lili osang angashi, idangjisa chubai ku mejeperji tepseta endok.

Tebang liliba ya meimchir lokti ajak nung angur aser iba ya benshiba ajanga temenen nung asenok mela-mela asonger. Asen tebilembaji shitak amai saka mela-mela iba lagi asenok ashioktsür. Asenok sarasadem lemsatepdanga, tajungshi o ashidanga, aser tangar asoshi aria bilemba jembitepdanga yakta dang asen oji lili o akümer. Khristan yimya tajung benshir ama saka memeteti item ya temenen peladaktsüba mapakümadoker alir.

### **Tibilemdangtsü Kar:**

Tangar den asenok sensaksem, tebang liliba o asü mesüra tim o jembir aji metetsü asoshi item ya latanga liang: Iba ya teyari tulu asütsü:

- “Ni ya ne dang ashi nung pai/lai kecha tamajung mebilemtsü alitsü-ar koda...”
- “Nai ya shianga danga teshima no...na asüba agi ashirba danga ko...”
- “Hai, naia ato angashir na...”
- “Ni par atema miim sarasadem ka lir no...oda tangar dangbo teshi..”
- “Shitakba-bo ya mashitsüla hi, saka ...”
- “ Ni Toshiba indang langkha shiti kor, nai shinga dang mashitsü südi...”

Item yimya aketba sensaksem ya gossiping aketba sensaksem lir. Akokba tashi nung item ya mejembitsü mesüra paidoktsü merangang.

Nai na jembishinüdang lilir – asü –masü metettsü asoshi item ya asüngdang?

- Ni jembitsü aliba o-tem yagi tangar ajungketer asü masü? Nai kodang tangar ka indang o tajung jembidir, iba lagi tangashirtemi-a nisungba indangji tajung bilemtsü. Kechiyong asenoki kechi angashir, azünge aser angur iba lagi asen tangatetba (mindset) yanglur , aser iba lagi asen inyakyim (action) anir.
- Ni jembiba otsütem ya kibur nungi “temelaba” (permission) lir-mali ta asüngdangang? “Ni bilemer pai mind masütsü, pai mejashitsü” ta asüba o-ji permission anguba o masü. Kodang ratamata bilemdir, iba indangji mejembi tajungba.
- Ni tebang liliba ya nüngdaker asü menüngdak, ta asüngdang. Liliba ya azümesener bangsen o ta Laishiba nung aiben shia angutsü. Efesia 4: 29 nung ashiba amato, “O koba ajanga tangar taküm yangluloktsü atema tenüngdaktsü lir, oda tangashirtem nem taochi agütsütsü, itemji dang jembiang.”
- Ni item jembiba yagi kar temulung yirutsü asü? “Medemer tajungi ne den jembitsü, saka ne anemerí ne indang jembia senzütsü.”
- Ajak dang tongtibangtibaji , “Ni jembiba o-tem yagi Tsüngrem sentswangshidaktsür asü-masü?” ta asüngdangbaji lir. Na meketa aliba purtemi ne jembishinü nung ne dak Khrista angur asü masü?

Adangji, o mekümdangi jembiba lagi Tsüngrem aser meimchir akümmetsübuba aser memeimba sayur. Tebang lilibaji tangar atema aria bilemba den mesütepi benshiba yimya lir. Liliba yimya lagi tejembir takümji dang menendaktsür masü, saka tangashir aser shiba

indang jembir pajia dena menendaktsür. Anungji, iba ya teraksa tulu adokdaktsüba “lokti mesen” tamajungji lir.

Laishiba nung ajidangra, tebang lilibaji merok mi amai lir ta Yakob 3: 5-6 nung shia angur: “Yamajisa temeli tenük-telen tila ka, saka asüküm tulu jembir. Ajiang koda mi tila agi arem tulu aronger. Aser temeliji mi ka, aser tenük-telen rongnung temeli ya memeshiba tulu lir. Iba lagi temang rangben menendaktsür aser yimya talungtsü mi adokdaktsür.” Asa-a, mesüra memeteti koda mi tila ka ajanga teraksa tulu adokdaktsür, yamaji tebang mekümdangi lilibaji ajanga tesendaktep raksatsür, tesempatep adoker aser teraksa jenti adoker. Tebang liba yagi asen meyong masüba otsütem temai adokdaktsür, aser tangashir tebilembatema mashileni anir.

Lilia yimya yagi Yisu tenünga menendaktsür. Kechiyong asen jakla yimya ajak agi aseni Yisu sayur asünung, kodang yamala yimya khristantemi amshidir Yisu Khrista asenoki tilutsür. Mathi 12: 36-37 , Yisu ashi – “Aser ni nenok dang ashir, nisungi kechi amajok o-sa jembir, parnoki iba o indangji o bendangba anogo nung langzütsü. Kechiaser ne o agi na metentsü, aser ne o agi na aitsü.”

Kechiba aseni jembiba o-tem ya o bendangba anogo nung bendangtsü ta Yisui ashir? Kechiyong aseni jembiba o-tem ya tebang nungi adoker masü saka tebang liba ya temulungjang nungi tenzüker. Luke 6: 45 – “...kechiaser kechi agi temulungjang sünga alir aji pei tebangi jembir.”

Ajioda, nisung shiai pei kechisa jembir aji temulungjang nungi jangraba o-tem adoker ta meteta pei mulungjang shisadanga alitsü nüngdaker. Kodang asenoki Tsüngrem O agi asen mulungsentsü tendangdir idangji asen chichiba tebilembatem metettsü (Ibri 4: 12-13) Tenüngsang Ken kaket nung Dawid chuba-i yamai sarasademba asenoki angur: “Kü bang nungi adokba otem, aser kü mulung nung bilemdangbatemji, ne madang tagizüktettsü kümdakjang, oh Kibuba, kü lung aser kü alangzüksang” (T. Ken 19: 14).

Asenoki Pa O agi mapang ajak nung asen o-tem aser mulungsentsü tendanga lira, Khristai asenok nem memeshiba ajak nungi tatok agütsütsü. Asen o-tem dang masü saka tebilembatem nungia merüktedaktsütsü. Na aser nia tebang liliba yimya süba-a lira aser Laishibai ashiba anema inyaka lira, Yisu dang tashi mait shia nangzüktsü aser pai asenok dak taochi tulu sayutsü.

Asenok ya “Tebang telilir masü, tangashir tajung asütsü” Laishibai ajungshir. Yakob-i ashir, nisung ajaki angatsü kara-ang saka jembitsü melungi süang (1: 19). Ano Yakob 3: 2 nung ashir, “temeli azüoktetbaji tanelia nung ainba temaitsü lir.” Adangji, aseni jembiba o-tem shisadanga yangtetbaji (filtered) asenok asoshi tajangzük tulu lir. Menüngdakba o-tem tanang küma jembitepba lagi lokti nung telemsa aser tesempatep dang adoktsür masü Tsüngrema sentsü me-wangshidaktsür. Tenüngsang ken zülur-ibo yamaji shia lir, “O Kibuba, kü bang madak tanüker ka yujangma; kü tebangmechi kishi nükangma. Nisungtem shirnoki tai inyaker,

parnok tamajung mapa nung matentsü Nai kü mulungjang tamajunglen teshidaktsüma, aser kü nem parnok chiyongtsü tajung techidaktsüma” (141: 3-4)

### O tem:

Asenok ajaki tebang liliba yimya nungi azükba alitsü Tsüngrem tsüngdang tenangzükba agidi. Talisa, asenok Arogo nung tenzükertem rongnung item jembitepba ajanga tanela nung kanga yiruteper aser temulung lungjemer temenen tongpang raratsü lula-a kümdaktsür. Gossiping ya tanga temenen benshiba den saku dang lir, aser iba yagi Ochi O nembangtsür aser tiyazü kuli züendaktsür.

Qnunji asenok nisung shiai Dawid-i  
sarasademba ama shidi, “Kü bang  
nungi adokba olem, aser kü mulung  
nung bilemdangbaemji, ne madang  
lagizükletsü kümækjang, oh  
Kibuba, kü lung aser kü  
alangzüksang”

(J. Ken 19: 14)

# Sabi-ji

TANELA TEMESHI

# Tashi

Mrs. Temsüla Lkr



**N**i tamanger kibong ka nung soa intet saka Tsüngrem chichiba mejangja liasü. Ni 1976 küm kodang ozü yimdak revival tulu liasü, ni revival nungi ajentsü merang, saka Tsüngrem nungi ni mejenbu. Tsüngrem kü taküm kümzüker Kotak tashi anir onüba yong iba revival milak tulu agi ni alenbang aser Tanela Temeshi tashi sabi kü mulung lapoktsü aser Tsüngrem meyong kümdaktsü.

Aser iba Tsüngrem Tanela Temeshi aniba nung ni aser ozü kibong Tsüngrem meyong temoatsü mezüngdangteta aser masadangtet-ba taochi agi tekübok jenjang nungi tanü aliba jenjang balala ajanga anir arur, tanü iba temoatsü asoshi Tsüngrem sanga alir.

Ao ken kaket no. 188 nung “Ni sa-la nü-ji kümdaktsü-tsü, Kü ket nung sabi agüjang...” ta asenoki ken atener. Shirnoki Tanela Temeshi sabi agizüker, iba sabi tashi agi ni anir. Tia balala ajak nung Tanela Temeshi temoatsü asoshi asen Tsüngrem tenüng sangdi.

## Tsüngremer sabi

Tejen putu aser tejen Lai mapang nung Tsüngremji shingaia mangu, saka Tebu Tsüngremi nübur rongnungi ainker jendi jatet. Tsüngremer mapang balala aser Pa sentongtem alima nüburtem den jembidaktsü aser sangdongdaktsü. Item rongnung tongtibang kar yamai lir. Abraham dang kodanga manguba lima ka bushia aotsü ashi, Noah dang alima tzü agi metsüngbangtsü lia par kibong atema rong renemtsü jembi. Mosa dang Israel nunger alar tia nungi anitettsü nungloksü. Yamaji, Samuel den aser Isaiah ainker den-a jembia liasü, ano aika den jembiba lai nung angur. "Anepdang shia pai ni sakdaktsür, Kibuba Tsüngrem kü narong lapokja lir aser ni tashi mangai mali asü" Isaia 50:4-6. "Saka kodang Tanüla Temeshi nekok dangi arudir, nenoki ain agizüktsü, Yirusalem nung aser Yihuda O Samaria ajak nung aser alima tatem donga nenok kü kulitem asütsü". Tenyartem Mapa 1:8. Kodang Khristanpur ajaki Tanela Temeshi agizüker, asenok ajak ya asen Kibuba Tsüngrem asoshi Pa kuliser ka ka asütsü koda tepelatsü. Ne nem aser kü nem agütsüba sempet Tanela Temeshi tashiji bener asen Tsüngrem kuliser ka ka asütsü merangdi.

Tanü putu nung nüngdak aika lir, nüngdakba lemang tapu aika asoshiji sabiji kanga tontibang lir, saka item ajak rongnung nübur asoshi nüngdak tongtibangji kari (vehicle) ya ka lir. Tanü putu nung kari ya makara nübur ajak asoshi timtemji asenoki meteta lir aser aji kang tongtibang ta angateter. Kari kaji sen aika agi alitsü saka aji teperi masü, kariji engine shidak alitsüla, kariji steering shidak alitsüla, kari nungji tyre pezüji shidak alitsüla, kari nungji totzü teperi alitsüla, saka item ajak lagi teperi masü, kechiyong kariji sabi lagi lapok nung

dang jaja (mesüra) longa otet aser iba sabi tashi jagi kariji abensadaktsür. Kari asoshi anir aotsü sabi tashiji melira kodaser asenok asoshi tongtibang akümctsü, aji amajok anungji kari ka asoshi sabi-ji ajak dang tongtibangba lir ta angateter.

Kari asoshi sabiji koma tongtibang lir yamaji asenok Khristan ka asoshia Tanelia Temeshi tashiji makara (mesüra) melira kodaser kümzükba pur rongnung züngsemctsü. Khristan taküm asoshi Tanelia Temeshi tashiji sabiji lir ta angateti. Lai jagi ashir nisungi Tanelia nung tanüben mesora Tsüngrem yimli semang angutsü makok. Yohan 3:5.

Asen taküm rangben Pa Tanelia Temeshi nem bendanga agüja asen temulungjang temerük aser tasen kaji akümctsü asen Kibuba Yisu Khrista Tanelia Temeshi sabiji ajanga dang asen temulung taroktibaji lapoka asen Tsüngrem nem meshitedakja bendanga agütsü nung dang Tanüla nung tanaben asoba takümji lir. Anungji asen taküm aser kibong iba Tanelia Temeshi nem anidaktsüba taküm aser kibongtem südi. Asen Yisu Khristai yokba, Tanelia den lungjema tanaben asoba Khristan taküm ka alitsü koda jangratemctsü lir. Asen Tsüngrem tenüngsangdi.

### **Mangdang ka lemsateper**

2019 asoshi Tsüngremer sentong kechi ta Tsüngrem dang sarsadema liasü. Mangdang ka yamai sayua liasü. Town ka nung shishilembar aika oli aruli ta senzütepa liasü, nisung telok ka kanga aritepa senzüa angu, ni parnok dang ya kechi bushir ta asüngdang nung, ola ka agi yamai langzü, “parnok ya alima kin ajak azü rakloba

tola bushir," anungji ni asüngdang.. Aya-a!! Alima kin ajak azü raklokba tolaji adoka lir na? Ola jagi ano yamai langzü "Au alima kin ajak azü raklokba tolaji adoka lir. Saka naa! tanü tashi nung alima kin ajak azü raklokba tolaji nisung kati dang semalir ta langzüa liasü. Aser iba tola asemsangji asen Kümtetdakba Yisu Khista lir ta langzüa liasü.

Asen tebu Tsüngremi alima meimchir meimba yong Tebu Chuba menden toktsür asenok kümzüktsü asoshi tetsü pok ajanga Yisu alimai aru. Saka alima kintemi Pa magizük aser Pa sendok. Meimchir menen alangzüktsü asoshi Pa taküm bendanga agütsü. Alima kintem menen asoshi Pai kukua Tebu dang mepishija sarasadem. Saka alima kintemi Yisu Khrista kangki nung südaktsütsü telemtetba agi aser Yisu kangki nung angenlok. Yisu kangki nung angenlokdang Yisui sübuba Pa süoshi/sübutsu ajak temeranger sepaitem lemsaa agi. Yisu kangki nung angenlokdang, Yisu dak nungi azü ayong ama ayim, Yisu dak nungi ayimba azüji Yisui asema tolaji lir ta amanger. Alima kin ajak asoshi Pai Pa taküm bendanga agüja kangki nung angenlokdang alima kin ajak asoshi Pa azü raklokba tola asembaji asen temeim Yisu lir.

Mashi mapang ka nung asenok taküm shia dangi Yisu senti zü raklokba tolaji ni aser nai semalirma ta asüngdanga arutsü, idangji na aser ni koba tola asemer rongnung tena alitsü. Aseni Yisu dang kechi langzütsü? Yisu senti zü raklokba tola asemer rongnung na aser ni dena melira koda tejashi aser tesasatsü asütsü. Asen kümtetdakba Yisuji taochi aser ochi temeim agi asüngba Tsüngrem, aser tatasaba Tsüngrem lir.

Khristanpur ajakji Yisu senti zü agi alangzükba purtem lir. Asenok tamanger shiaji Yisui kümzükbapur kaka alitsü merangdi. Yohan 14:16.. “Ni Tebu dang meshitsü, aser nenok den teti alitsü asoshi, Pai nenok nem tangar süneptsüba ka agütsütsü.”

Kari asoshi sabi koda nüngdaker aser tongtibang lir, yamaji khristanpur asoshi Pa Tanela Temeshi sabiji koda tongtibang. Asenok Khristan taküm tanaben asoba taküm aser kümzükbapurtem rongnung atentsü asoshi iba Tanela Temeshi sabi jagi asen temulungjang taroktiba lapokdakja Yisu nem bendanga agüja meshiteta lira, tia ajak nung süneptsütsü, moatsütsü, aser asen shisabulu ajak nung Yisui kümzüka anitsü. Khristanpur asoshi iba Tanela Temeshi tashiji makara aser medenra kodaser kümzükbapur rongnung adentsü. Yisui asen kümzükba aser asen den Pa Tanela Temeshi adenba, aser Pai aniba meteta amanger rongnung lidi ta ayongzüker aser lemsateper.

“Saka Pa **TESANGWA** nung aliba amaji  
asenokia tesangwa nung jajara, asenok kati ka den  
telungjem kar, aser *Pa Chir Yisu zü agi* asenok  
temenen ajak nungi merükdaktsür”

1 Yohan 1:7

# TEPELATSSÜ

OSANG  
Isaiah 9:2-6



Rev. A. Chuba Jamir

December 1903 tsüngküm mapang ka nung Wright brothers'-i aiben merangdanger külen takok tulu ngua “flying machine” ali nungi anüngi yimketa tudakja liasü. Kanga pelaseta parnoki tenu Katherine dangi telegram ka yamai yok. ‘Kay ok. onoki ali nungi anüngleni feet 120 yimketa tutetogo, anungji onok yakta kidangi arua Christmas külemi amungtsü.’ Katherine-i iba osang ngur aritepa local newspaper editor dangi oa iba osang sayu. Editor-i iba telegram ken repranger ashi, Oh koda tepela takok osang, aser newspaper nungji yamai zülutsü ‘Wright brothers-ji Christmas nung kidangi arua amungtsü’ Parnok atema osang tongtibangtiba aser tepelatsü osangji kidang arutsübaji masü saka nisungi ali nungi anüngi yimketa tutebaji liasü. Saka iba tongtibangtiba aser tepelatsü osangji osang kaket (newspaper) nungji medensem.

Tanü nüburtem aikati Yisu sayatenya nung asoba osang tajungji mebilemi Christmas mapang pelatepba benjong dang yanglua amunger. Saka shitakba aser meimchir asoshi osangtajungji Kotak tenyartemi sangoktsübaji lir. “Aser tenyar lagi parnok dang ashi, ‘Metsübui liang kechiaser ajiang, ni nenok dangi nisung ajak asoshi tepela tulu osang tajung bener arur. Kechiaser tanü nenok nem David yimti nung kümtetdakba ka soja lir. Paji Kibuba Khrista lir” (Luke 2:10-11). Yisu asoba mapang nung tongtibang nisung aikati iba tepela osang tuluji missed asü.

Herod chubaia ya missed asü (Mathi 2:13-17). Yisu asoba osang angashir Herod chuba aser Yirusalem nunger ajak aoksa (V.3) tenyar ajanga sangoktsüba osang angashir, Bethlehem moapu nungi sannükertem tama sûr ilonga arua Yisu süngjema mejanga aliba tsük mejakdak tesemi arua Pa külem, tepela tulu nung meyipa ao. Ano anüdoklen nungi tashi temeteter tem, Yisu nem sempet agüja Pa külem aser tepela tulu nung pei lenmangi meyipa ao (Luke 2:25-32). Israel süneptsüba osang yongya aser lumia atar tambur simon-i temeshi tenla kidang, kodang pa ket nung tanur Yisu agizük, Tsüngrem tushia ashi, ‘Nai ne tenzüker tesünep nung piladakjang, kü nülai ne tekümtet nguogo.’ Yamaji iba osang tajung angashirtem asoshi, Yisu asoba osangji tesüngmangtsü tepelatsü osang tuluji liasü.

Saka tamaren Herod Chuba-i iba osang angashia Yisu külemtsü melena Pa kanga aoksa aser Yisu tepsettsü bushi. Ibaji dang masü Bethlehem nung aser iba temeket nung tanur küm 2 nungi teküpok ajak tepsettsü ozüng

agütsü. Anungji ainkar Yirimia-i shinba ama Rama nung mangyim tulu liasü (Mathi 2:16-18). Iba osang tajung ya magizüki Herod taküm tembangba ya tesasatsü tulu liasü. Yisu asoba osang ya meimchir asoshi osang tulutiba, tajungtiba aser tepelatsü osangji liasü. Lipok nungi Tebui renemba mission takok tulu angu. Alima dangi tekümtet asoshi techir ka dang aliba ajunga bendanga agütsü. Anungji alima meimchir asoshi iba ya tepelatsü aser tesüngmangtsü osangji ya lir.

### **Pa osang ya tesüngmangtsü (His message is wonderful) Luke 2:10**

Alima temenen rara teyalong nung Pai osang ka bener aru. Ibaji alima nung tesünep aser yimjung. Tongmelang osang ka Pai sangoktsü aser ibaji Pa dak amangtsü, aser iba osang nung ya ain aser tashi liasü. Anungji iba osang agizüker ajak nem tatok agütsü aser teti taküm angutsü tekümtet agütsü. Shirnoki iba osang amang aser agizük taküm nung temelensi tulu liasü.

### **Pa temeim tesümgangtsü (His Love is Wonderful).**

Meimchir tashi mangaba ajanga tebu sentsüwangshi nungi talangka pilar, tesamatsüba dang liasü. Saka Yohan 3:16 nungi yamai ashir, “Kechiyong Tsüngremi alima odang meim nung Pai Pei ajaso Chir agütsü, anungji shirisa Pa dak amangdir mesamatsü, saka teti taküm angutsü.” Yisu temeim ya tesüngmangtsü aser iba temeim ya Khrista asoba Mongpu nung jungkai adok. Iba temeim asadangtsü makok. Yisu Tebu Kotak menden sentsüwangshi ajak toktsür alima temenenpur alangzüktsü atema Pa alimai arua asen den saku küma ali. Nashi ki nung aso, tazüngla aküm, ajemalua tatem tashi aremzüka oda asen menen yong tasütsüa bendanga agütsü. Tesamatsüba nungi tekümtet agütsüba temeim, tatok agütsüba temeim. Iba temeim ya kanga tulu, ken aser teti asoshi agütsüba temeim. Iba temeim talubosa ya kodanga majentsü. Anungji meimchir ajak asoshi bentsüba osang tajungji agizüktsü renema atadi.



# KABA

## Neighbourhood Fellowship Osang

Mr. O. Sashi Ozüküm

Kohima Ao Baptist Arogo nung tanelatem ayimjema anir aruba wadang inyakba mapa rongnung Neighbourhood Fellowship (NF) tekülem sentong ya ka lir. Joko KABA nung iba NF sentong tenzüker küm Ter-ana (12 years) abensa arudagi. Kechiba ita nung khen iba NF tekülem sentong ya akar? Neighbourhood Fellowship ya kechi amala sentong ka, koma akar aser kechi ajangzüker? ta bushidangra kuli tajung aika lir. Iba ama tanelar wadang ya tongtibangsa KABA ama nütsüng yongsük merijang aika oda mayimjemtet aliba yimti ka nung kanga tapet wadang ka lir.

### I. Neighbourhood Fellowship ya kechi amala ka?

KABA kübok tang Fellowship tenet (7) lir. Saka Neighbourhood Fellowship nungbo telok 279 lir. Iba telungjem sentep ya ita tatembangba shia Bodhbar aonung Tenla kidang masü saka kibong 279 nung lemsaa pei pei telok akar. Tang KABA nung tenzüker tenzükla

ajak agi 1100 dak tema lir, aser ano Neighbourhood Fellowship telok 279 nungji leaders ajak agi 558 lir. NF telok ajak kübok adener kibong merijang asem ser noklang pongu jungnüa lir (Around 3500 families), yamaji item kibong ajak nung melentepa sentongji kayonga aor.

Neighbourhood Fellowship telok shia nung kibong 5-10 aser kar nung 10-15 ta lemsaja lir. Yamaji group lenirtemi ita shia shir kidang akatsü, aser shibai anitsü (facilitate) itemji mapang jilia lemsaa agütsür. Küm nung ita 12 tsüngda nung ken telok shia nung iba telungjem kati-ka den pei temoatsü lemsatepba akar.

### **2019 küm tetenzük nung NF Leaders' Orientation agiba noksa**



Neighbourhood Fellowship telok shia nem Laishiba nung amshia aliba tenüng tapet kaka agüja lir, aser pei telok nung lenir (Group Leaders) anana shimteta lir. Item telok ajakji Arogo mapangsürtem ka ka kübok telok pongu trok incharge agia tongtepratepa aor. Yamaji NF telok ajak atema telok telemsa kaket ka adoka amshia arudagi.

## **II. Neighbourhood Fellowship sentongji koma akar?**

Neighbourhood Fellowship atema tesayuba leniba kaket ka nüngja “Simply the Story” (STS) “Otsüji dang Shiang” ta ser Laishiba nung agüja aliba otsütem nungi amendaker kaketji adoka amshia arudagi. Iba NF ya taintem asoshi dang masü, saka kibong nung tsürabur, tanurtem aser kiyongertem ajak tsüngda Laishiba otsütem nungi kati ka nungi angazüktepa lemsateper. Iba den pei kibong khuret lemsatepa, kentena aser sarasademtepba sentongtemji agiyonga aor.

Ano Neighbourhood Fellowship telok aika nung (Inter-tribal marriage) kin balala den kibong kümer alirtem lir, aser parnok asoshi kecha metsükdaki sentongtemji Nagamese, English aser Ao oshi nung meyoktepa lenji otepa sentongtemji agiba ajanga ajak sakuku shilem agitepa temoatsü angur.





### III. Neighbourhood Fellowship ajanga koma ajangzüker?

KABA nung tamangertem talisa taintem, tila tanurtem aser sentepi aotsü yimya mesübai alirtem, ano lokti nung kodanga shilem magidangi alirtem asoshi tanem tanemi Neighbourhood Fellowship nung yimya sübaa shilem agiba ajanga joko tekülem sentep menungra kümdaktsür aser shilem agitsü tasü eita akümer. Ano taintem shirnok kimokertem lir parnoki tekülembö menungrar saka mouteter, parnok asoshi NF tekülem nung oa tena shilem agitsüsa maongka sadema angur.

KABA kübok Fellowship shia tekülem sentep nung Neighbourhood Fellowship telok anana asemsem külemei lokteper tekülem sentep bendanga agitsü, kententsü amala shilem balala agütsür. Senpetbo tajung liaka kodanga sentepi marudangi kinük nung alirtem aikati shilem tajung agiba dena tekülem sentep kanga longsoa akümer.



## O Tempang

Meimchir taküm ya mazüngi dang alir, office nung tulurtemang mazüngba, tilartem mazüngba, shishilembarsa mazüngba. Shidi süra ano aluyimertemsä mazüngba. Ano talisa Kohima ama town ka nung alirtem pei pei mapa nung kanga mazüngi dang liteper. Anungji aiben kiyonger süaka kibok semtepa otsü lungtepa amentsü mapang mali. Saka NF akaba ajanga kiyonger süaka kodanga majurutepdangi alirtem külemi longjemer Tsüngrem külema khuret lemsateptsü mapang tajung angur. Adangji iba NF telungjem ajanga kiyonger tsüngda temeimtep, aria bilemba aser tesendaktep tajung renlokba kuli aika lir. Tsüngremi KABA nem kanga shisa tajung agüja iba Neighbourhood Fellowship tekülem sentong tenzükogo ta bilemer aser ya ajanga Arogo nung tanelar wadang kanga ayimjema aoba temoatsütem aika lir. Tajangshiba tajung aika nungi tongmelang agi iba osang tatsü ajanga lemsateper, tazünger ajak Tsüngremi moajangma.

# OSANGTEM

ARORO GENERAL OSANG

December, 2018 - November, 2019

‘ Kati  
ka den  
Meimtepang ’

Omen nung ajemdaker  
küm tepiyong Arogo Inti  
aser Ministry ajak nung  
sentong tapu Palala pei  
Ministry dak apet agia aru.  
Iba den Fellowship ajak  
nung aonung sentep nung  
Pastortemi 1, 2 & 3 Yohan  
Kaket nungi Lai Bushiba  
sentong agia kanga dang  
temoatsü tulu ngua aruogo.



Mr. A. Moa Longchar  
*Arogo Secretary*

**TENLA KI:** Amangbapurtem ajaki yongyaseta aliba KABA Main Church yangluba mapa tembangarur 28th April, 2019 nung Ki meshitetba sentong “Tsüngrem Dang Sentsüwangshi” ta omen nung ajemdaker kanga mera keta Rev. M. Asangba Longkumer, Senior Pastor-i sarasadema lapoktsü. Aser iba tenla kidang ita nung ken - tasembuba Deobar (3rd Sunday of the month) lokti ajak külemi sentepa temoatsü agia arudagi. Küm 8 tashi Fellowship balala nungdang sentepa arur ano asentenshia külemi sentep akhatsüsa Tsüngremi mapang tajung bener arutsüba atema pelaseta, temeimba tembartem aser adianutem nguyutepa aser ajurutepa lemsatepba mapang tajung ka ta pelatepa iba anogo külemi akar.

### **TOKLANG TENZÜKERTEM**

Tsüngremer tajaba angateta tenzükba mapa balala nung pei dak akaba tajungtiba sempet aser mapang agüja Kohima Ao Baptist Arogo nung toklang tenzükba mapa nung lia arur Tsüngremer mapang tetemsü nung item tenzüker ana mapa nungi anisüngzük agia liasü.

**Rev. I. Yapang Walling (Dibuia), Pastor :** 1996 küm nungi Associate Pastor ka ama tenzükba mapa nung join sur küm 23 shi Fellowship balala nung Sannükba mapa inyaka arur, 5th May, 2019 Deobar sentep nung mapa nungi anisüngzük agütsüba sentong agi. Pa aser par kibong ajanga Tsüngremer Arogo asoshi tanelanung jenti tejang tanga rendaktsüogo. Tsüngremi maneni moajang ta sarasademtsür. Pa melena Pastor tasen ka meshim tashi Mr. O. Sashi Ozüküm, Asso. Pastori-i Merhülietsa Fellowship Pastor incharge agia atatsü nungloksür tang tashi inyaka arudar. Arogopur ajaki maneni par kibong tenzükba asoshi sarasadem nung yaritsü metedaktsür.

**Rev. Arenla Longchar (Waromung) Associate Pastor, Mission** | 2005 küm nung Music Director Cum Mission Coordinator ka ama join sur 2013 tashi Ministry ana kanga dang takok ngua inyaka aru. Arogoi nüngdak ta angateta 2014 nungi Music Ministry nung nübu tasen ka Ms. Amongbi Jamir shima la nem Music Ministry mapa belenzüka yutsü. 2014 nungi Mission Ministry nung dang temulung agüja takok tulu ngua inyaka arur 2nd June, 2019 Deobar sentep nung mapa nungi anisüngzük agütsüba sentong agi. La mapang nung Arago asoshi Music aser Mission Ministry nung kanga dang takok tulu ngua mapa tulu jenti inyakogo. Tsüngremi La aser kibong maneni moajangma ta sarasademtsür.

**Mr. Imnazülu Jamir (Mangmetong) : Mr. Imnazülu Jamir (Mangmetong) Mokokchung Town Baptist Arago nungi lir.** MTBA nung Youth Director küm asem tashi inyak. Ano M.Th renemer UESI ( Union of Evangelical Studies of India ), Karnataka nung küm 14 shi tenzükba tarensen balala nung Regional Field Secretary tashi inyaka lia Arogoi kanga dang moa Rev. Arenla Longchar melen Associate Pastor Mission mapa 1st June, 2019 nungi agizüka inyaka arur. Pa ama Mission mapa nung kanga dang experience akaba nübu ka ngutetba atema Arogoi kanga pelar aser pa ajanga asen Arago asoshi Mission mapa tuluba inyakteta aotsü sarasadema atar. Asenok ajaki pa aser par kibong tenzükba atema meneni sarasadem aser shisatsü agi nungita yaritsü mepishir.

**Mr. Bendangsashi Walling (Khar) :** Mr. Bendangsashi Walling (Khar) Aoyimsen Arogo nungi lir. Pa Medziphema Ao Baptist Arogo nung Associate Pastor Youth mapa inyaka arur ano tali tangazükba nüngdak ta angateta Gurukul Lutheran Theological College, Chennai nung M.Th renemer lia asen Arogo nung Associate Pastor inyaktsü shima June, 2019 nungi Ministers' Hill nung Associate Pastor mapa inyaka arudar. Pa tenzükba mapa asoshi asenok ajaki maneni sarasadem nung nungita alitsü ayongzüker.

**Mr. Toshimar (Chuchuyimlang) :** Mr. Toshimar, Chowkidar, Chuchuyimlang yim nungi lir. Arogoi kanga dang temulung lemteta Chowkidar mapa inyaktsü asoshi shimer 1st December, 2018 nungi tenzüka inyakdar. Pa aser par kibong asoshi Arogopur ajaki shisatsü sarasadem nung maneni nungita yaritsü mepishir.

## **MINISTRIES**

Neighbourhood Fellowship : Kohima nung alitem ya timba ka mapa balala nung sotaka alirtem aser kanga dang mazüngidang alirtem lir. Anungji sentep kidangi talisa aonung senteptem nung aiben moteter. Ajidang masü kiyong kinartem dena majurutepteter. Anungji Arogoi 2007 küm nungi tenzüka ita shia tatembangbula Bodhbar (last wednesday) telok tilala lemsar anasatepa alirtem külemi ki ka nung sentepa lemsatepba, ajungshitepba aser metetpelatepa kati ka yaritepa arudagi. Iba nung yimya balala agi nebürtem shilem agidakja arur aser iba yagi jentipur temoatsü balala agia arur.

**40 Days Dawn Prayer :** 40 Days Dawn Prayer ya anep-dang züngia sarasademba sentong ka lir. Aser taküm agi küm pezübuba khaogo. Taküm küm atema iba ya anaben lemsar August aser September ita nung agia nüburtem jenti temoatsü ngua agiogo.

**Father School:** KABA ministry tongtibangtiba rongnung Father School ministry ya ka lir. Iba ya ajanga asen Aor rongnung dang masü Naga lima tesem aika nung tebutem aika temelensi tulu ngua arur. Aser Tsüngremi KABA nem iba ministry ajanga tebutem aika ajangzüktsü mangdang agütsü ta tangatetba nung inyaka arur. Taküma item Arogo aser telok nung iba sentong kanga dang temoatsü nung agia aruba lemsateper.

**Arogotem:** Chuchuyimlang Baptist Arogo, Merangkong Baptist Arogo, Khaimniungan Baptist Church, Tuensang, Pongro Town Baptist Church, Alisopur Baptist Lithro, Longjang Compound Baptist Arogo, Mekuli Baptist Arogo, Central Baptist Church, Kohima, Jalukie Town Ao Baptist Arogo, Longtho Baptist Arogo, Police Baptist Church, Saijang. Tang tashi nung KABA ajanga Father School khatsüba telok ajaki agi 71 lir. Tsüngremi item Arogo aser telok ajak nung maneni mapa inyaka moajang ta sarasademtsür

**Free Health Clinic:** Tanel aintsü atema Tsüngrem O tapet agi amangbapurtem ajungshia yariba den ano temang shi nung timtema alirtem yaritsü nüngdak ta angateta küm aika iba Free Health Clinic ya Mission Ministry ajanga anebalua khaa arudagi. Iba ya anebalutsü kanga dang tasak lir. Saka parnok committee ka nem nunglokja kanga dang takok tulu nung anir aruogo. Parnok den Doctor aser Nurses shirnokisa iba

ministry nung pei tajungtiba agi yaria arudagi. Nenok ajak dang Arogoi kanga dang pelaba metedaktsür aser Tsüngremi nenok ajak meneni moajang ta sarasademtsür. Iba ya Aortem aser tamangertem atema dang masü, saka tanga kintem, mamangertem ajak shirnoksa tanebtsü nungdaka lir parnok ajak yaria arur. Taküma iba camp ya 16 ben tashi Sector Fellowship ajak nung melentepa khaa jentipur tanebtsü aser temoatsü ngua aruogo. Tsüngrem tenung asanger.

**Healing & Prayer:** Arago ministry rongnung kanga dang tongtibang kaji nüngdakbapurtem temang shi aser tanela nung tanebtsü agütsütsüba ya lir. Iba tangatetba nung Ita shia 2nd Thursday iba Healing & Prayer sentong ya agia arudar. Iba ya ajanga nüngdakbapurtem aika temoatsü aser tanebtsü ngua arudagi. Ano kari iba ya mejangjai lira arua atentsü ayongzüker. Tang tashi nung iba ya Ita shia tanabuba Thursday anepdang 6 – 7 AM Chandmari Fellowship nung agia arur August ita nungi tenzüka Main Church, Town nung agia aru.

**Self Employment Generation Program (SEGP):** Kohima Ao Baptist Arago nung lanurtem aika dang tazüngba nung kanga takok tajung ngua zünger, saka mapa mangur aika lir. Aser item lanurtem tarutsü jenjang yanglutsütsübaji Arago khuret ta angateta taoba 2016 küm nungi tenzüka iba SEGP ya tenzük. Iba ya ajanga lanurtem nem Arogoi sen terara agüja pei inyaktetba mapa (Business) inyaka pei jenjang yangluba nung yarir. Tang tashi nung lanurtem nisung 38 shi nem iba teyari agüja kanga dang takok ngua inyaka arudar.

**Senior Citizens Fellowship:** KABA nung tantsü tambu aika Tsüngremi moaja lir. Item tsüraburtem den küm shia October ita mezüng honibar Arogoi sentong tajung yanglua parnok nem shilem balala agidakja, metettepa fellowship kha arur. Taküma iba sentong 5th October nung tsürabur parnok nisung 154 shi sentepa kanga dang pelatepa tomoatsü agia amung.

**Temeshi Kiyimba:** Taküm küm tsüngda (December, 2018 – November, 2019) asen Arogo nung Temeshi kiyimba sentong item ya agia liasü. Maneni item kibongtem atema asenok ajaki sarasadem nung bilemtetdi.

1. 04-12-2018 :  
Temsüpokla Longkumer (Longpa ) & Simon Aier (Longpa)
2. 14-12-2018 :  
Nungshienla Amlari (Changki) & Akümjung Jamir (Mopungchuket)
3. 14-12-2018 :  
Nzenbeni Kikon (Lotha) & Imnanükshi Longkümer (Longsa)
4. 15-12-2018 :  
Nyukep (Phom) & Imnatoshi Jamir (Kangtsüng)
5. 17-01-2019 :  
Yimsükümla Jamir (Salulamang) & Limadangit Walling (Nokpu)
6. 18-01-2019 :  
Jekukala Kichu (Chungtia) & Watilong Longkümer (Waromung)
7. 18-12-2018 :  
Watisüngla Imchen (Longkhüm) & Meyipokba Jamir (Mopungchuket)
8. 22-02-2019 :  
Neelam Chettri (Nepali) & Imliwapang Tzüdir (Yimjenkimong)
9. 01-03-2019 :  
Sinya Kath (Rengma) & Moamar Imsong (Anaki)

10. 05-03-2019 :  
Therali Ezüng (Lotha) & Apangtsüng Aier (Mongsenyimti)
11. 05-03-2019 :  
Akümla Longchari (Changki) & Tongpang L. Jamir (Unger)
12. 08-03-2019 :  
Imlinungla Tzüdir (Aonokpu) & Tsüktiyatet Jamir (Chuchuyimlang)
13. 08-03-2019 :  
Tarenkala Longkümer (Longjang) & Tiakümzük Sempo  
(Chuchuyimpang)
14. 26-03-2019 :  
Bendanglila Longchar (Khensa) & Wapongtemsü Jamir  
(Mopungchuket)
15. 05-04-2019 :  
Nitili Shikhu (Sema) & Tiaaküm Alinger (Changki)
16. 05-04-2019 :  
Neizhanuo Golmei & Ochentsüngba Ozüküm (Mongsenyimti)
17. 12-04-2019 :  
Neiletunuo Neo (Vihoma) & Moatoshi Pongan (Chuchuyimlang)
18. 03-10-2019 :  
Temjensangla Ozüküm (Mopungchuket) &  
Arichemba Imchen (Mangmetong)
19. 10-10-2019 :  
Ngalachon Keishing (Thangkul) & Taliremba Jamir (Khar)
20. 11-10-2019 :  
B. Libeni Yanthan (Lotha) & Temjensoba Jamir (Changdang)
21. 11-10-2019 :  
B. Tekayangla Kichu (Chungtia) & T. Merang Jamir (Aliba)
22. 29-10-2019 :  
Imkongla Longchar (Chungtia) & Chubaonen Aier (Longjang)
23. 31-10-2019 :  
Wapangienla Longchar (Mangmetong) & Thejao Mepfhuo (Angami)
24. 05-11-2019 :  
M. Amenla (Orangkong) & Merenwati (Unger)
25. 05-11-2019 :  
Chubalemla Aier (Süngratsü) & Imsüyanger Jamir (Longmisa)
26. 12-11-2019 :  
Sangyukümla Jamir (Mopungchuket) & Imliwapang Aier (Longpa)

27. 14-11-2019 :

Tiasangla Pongan (Longsa) & Temsünungsang Jamir (Longsa)

28. 14-11-2019 :

Imonenla Imsong (Merangkong) & Mr. Bendangrenba Ozüküm  
(Süngratsü)

29. 15-11-2019 :

Lothungbeni Humtsoe (Lotha) & M. Manen (Mongsenyimti)

### Arogo tenzükertem:

Tang Arogo nung toklang tenzükertem

1. Rev. M. Asangba Longkümer, Senior Pastor Waromung
2. Rev. I. Bendangmeren, Pastor (A. G.) Longkhüm
3. Rev. T. Chuba Jamir, Pastor (Town) Changdang
4. Rev. A. Chuba Jamir, Pastor (Lerie ) Changtongya
5. Mr. Senthishi Aier, Pastor (Bayavü) Süngratsü
6. Mr. Temjenmongba Sempo, Pastor (M. Hill) Chuchuyimpang
7. Mr. Tiatoshi Longkumer, Pastor (Chandmari) Longjang
8. Mr. O. Sashi Ozüküm, Asso. Pastor  
( Pastor I/C Merhülietsa) Mongsenyimti
9. Rev. Yashila Jamir, Asso. Pastor Women Ungma
10. Mrs. Alice Walling, Asso. Pastor Christian Edn. Khensa
11. Miss Amongbi Jamir, Asso. Pastor Music Mopungchuket
12. Mr. Sakurepba Tzüdir, Asso. Pastor Youth Changki
13. Mr. S. N. Among Jamir, Asso. Pastor, Fellowship  
Longmisa
14. Mr. Imnazülu Jamir, Asso. Pastor, Mission Mangmetong
15. Mr. Bendangsashi Walling, Asso. Pastor, Fellowship  
Khar
16. Mr. A. Moa Longchar, Arogo Secretary Khensa
17. Ms. T. Rongsenyangla Aier, Arogotsür Secretary  
Yajang
18. Mr. Longdisang Tzüdir, Accountant Cum Cashier  
Molungkimong

19. Mr. Bendangtuba, Office Assistant	Changtongya
20. Mr. P. Khampong, Driver	Khiamniungan
21. Mr. Gopal Thapa, Driver	Nepali
22. Mr. Tinuangnen, Chowkidar	Waromung
23. Mr. Akümchuba, Chowkidar	Mongsenyimti
24. Mr. Toshimar, Chowkidar	Chuchuyimlang

### Term Post

1. Mr. Senti Longkümer, Home Evangelist	Mopungchuket
2. Mr. Lipokzülu, JMC Manager	Mopungchuket
3. Mr. Sentinungsang, Property Secretary Cum Work Supervisor	Mokokchung
4. Mr. Lanuaküm, Sound Technician	Longjang
5. Mr. Lanumeri , JMC Chowkidar	Longkong

### Fellowship Chowkidar

1. Mr. Longdinok, Chandmari	Süngratsü
2. Mr. Moatemsü, A.G.	Mongchen
3. Mr. Tangit Pongan, Lerie	Chuchuyimlang
4. Mr. Vithong, Ministers' Hill	Tihir
5. Mr. Koramongba Jamir, Merhülietsa	Molungyimsen
6. Mr. Aotemsü, Bayavü	Changki

### Deacontem

1. Dr. Imotemsü	Khensa	Town
2. Mrs. Tiamenla Longchar	Waromung	Town
3. Mr. T. Temsü Jamir	Asangma	Town
4. Mr. Talimeren	Kinunger	Chandmari
5. Mr. Kikalemba	Khar	Chandmari
6. Mrs. Rowainla	Süngratsü	Chandmari
7. Mr. W. Meya	Longjang	A.G.
8. Er. Sübongliba	Settsü	A.G.
9. Mr. S. Toshitemsü Jamir	Mopungchuket	A.G.

10. Mr. Imti Longchar	Aonokpu	Lerie
11. Mr. P. Ajung Amer	Changki	Lerie
12. Dr. M. Temjen Longkümer	Mopungchuket	Lerie
13. Mr. P. Talitemjen Jamir	Akhoya	Ministers' Hill
14. Er. T. Yanger Ao	Dibuia	Ministers' Hill
15. Dr. I. Bendangla Longkümer	Chuchuyimpang	Ministers' Hill
16. Mr. Marsoba Imsong	Longkong	Ministers' Hill
17. Mr. R. Odimar Jamir	Kangtsüng	Ministers' Hill
18. Mr. N. Rongsensashi	Waromung	Merhülietsa
19. Dr. Watikala	Longkhüm	Merhülietsa
20. Er. S. Lanu Jamir	Unger	Merhülietsa
21. Mr. T. Yanger Ozüküm	Mongsenyimti	Bayavü
22. Mr. P. Moa Longkümer	Kübza	Bayavü
23. Mr. Obang Longchar	Changki	Bayavü

### **Committee balala nung convenortem**

1. Property Committee	Er. Sübongliba, Settsü
2. Evangelistic Committee	Mr. A. Nungshi Ozüküm, Mongsenyimti
3. Prayer Committee	Mr. M. Panger Aier, Longjang
4. Mapangsür Secretary	Mr. Nekentoshi, Khensa
5. Sunday School Superintendent	Mr. Moayanger Jamir, Mopungchuket
6. Child Supervisor	Mrs. Atula Imchen, Mangmetong

### **Arogo kübok tenzüker aser tenzüklatem Department balala ajak meyokteper yamai:**

1. Full time tenzükertem	= 29
2. Part time Chowkidars	= 6
3. Deacons	= 23
4. Mapangser	= 82
5. Finance committee	= 1
6. Church Bulletin Editor	= 2

7. Auditors	=	3
8. Property Committee member	=	3
9. JMC Managing Board	=	4
10. Mission Board member	=	5
11. Free Health Clinic	=	15
12. Mission Osang Editorial Committee	=	3
13. Evan committee	=	130
14. Prayer committee	=	132
15. Music Board member	=	5
16. Arogo Choir	=	187
17. Eirene Choir	=	25
18. MMC teacher	=	11
19. Pianist	=	16
20. Arogotsür tenzükla	=	89
21. Sanctuary Flower club	=	43
22. Learner's Cell committee	=	6
23. Miim shiti editors	=	2
24. Christian Education Board	=	2
25. Anogoshia Chiyongtsü Editorial Board	=	2
26. Children Library	=	1
27. Child Supervisor	=	1
28. CEF teachers	=	35
29. Sunday School Superintendent	=	1
30. Sunday School teachers	=	102
31. Youth Advisor	=	6
32. Youth Evangelist	=	7
33. Youth Leaders	=	75
Total	=	1,054

### Arogo Züngsem & Tzüsenba:

1. Küm tsüngda nung Khrista agizüka tzü nung tzüsenba  
sentong asemen liasü = 207
2. Transfer aruba ajak agi = 128

3. Atsünga alir meyipa agizükba sentong aseben liasü	= 23
4. Tanga Arogotemi transfer aoba	= 184
5. Atsüngba	= 19
6. Tasüba	= 25
7. Tang aliba züngsem ajak agi	= 9,388
8. Kibong ajak	=3,461

### **Arogo Züngsem shiai meteta alitsü kar:**

1. Arogo ajanga kibong akümtsüpür ajak ani asüng (engagement) Arogoi agütsütsü. Ibaji expenditure kecha makai Arogo Office nung dang tsürabur anatsülen dena akatsü.
2. Engagement agir külen anogo roker (60 days) abensar külenang kiyimba kulizüng agitsü melatsü.
3. Engagement agir koda masü Temeshi kiyimba kulizüng magitettsüsa kümra Arogo nem metedaktsütsüla. Shiba (tetsürla/ tebursang) tai ajanga iba tenangzüktepba raksadir, pa/la ita trok (6 months) atar külenang tanaben engagement agitsü melatsü.
4. Ani asüng aser Kiyimba kulizüng agitsü atema tetsürla mesüra tebursang tena rongnung kabosa Kohima Ao Baptist Arogo nung züngsem alitsüla. Arogo nung shiba züngsem mali, pa/la aliba Arogo nungi kuli shiti tabensa aka nungdang sadi kulizüng agütsütsü.
5. Aotsür, Aor kiba lenbuba nung kin kidong talitsüyim, tashishitsü mali ta Village Council Chairman nungi shiti (recommendation) abentsüla.

6. Kiyimba benjong mapang temesepba chiyungtsü amshitsü memelar. Aser telok chiyungba dak alaka kidang aser tanga nung party akaba memelar.
7. Tenla Ki dak alaka tanga tesem nung Temeshi Kiyimba Khulizüng agitsü memelar.
8. Temeshi Kiyimba benjong nung meyipa agütsüba senpet (return/ thank you gift) mamshitsü Arogoi ajungshir.
9. Temeshi Kiyimba sentong nung shinoki temeja ken atener. Parnok dang Gospel ken dang atentsü metetdaktsür.

Iba inyakyim leniba ya 1st December, 2019 nungi tenzüka amshitsü.





**I**ba osang azünger ajak den Tsüngrem temeim salem tamasa lemsateper.

2019 kum tepiyong Tsüngremer temeim aser taochi aser amangbapurtem sarasadem ajanga JMC Ministry kanga dang takok ngua aruogo. Tsüngremer temoatsü aika rongnung JMC Ministry atema Floor tasen ka renemer July ita nungi amshia arudagi.



**Mr. Lipokzülü**  
**JMC Manager**

Taküm küm January nungi November ita tashi nung JMC ya yamain amshia aruogo.

## January 2019 nungi October 2019 tashi nung agia aruba programme tem yamai liasü.

S.N	Date	Programmes
1.	January 3rd – 6th	Mongsenyimti Sarasadem Telungjem Kohima
2.	January 23rd - 25th	Nagameese Baptist Church Association Sunday School Teachers Training
3.	January 24th	Tikhir women Union Kohima
4.	31st Jan – 3rd Feb	St. Joseph's College E.U Camp
5.	February 1st – 3rd	ABAM
6.	February 9th – 11th	KABA Mission week Guests
7.	February 12th	KABA Toklang Tenzüker Retreat
8.	February 14th – 16th	Mopungchuket Baptist Arogo
9.	February 22nd	KABA Youth Ministry
10.	February 23rd – 24th	Kohima Lotha Baptist Church
11.	March 9th	Phom Church Kohima Youth
12.	March 11th – 17th	KABA Revival
13.	March 21st	Viswema Baptist Church
14.	March 27th – 29th	ABAM
15.	March 29th – 31st	Waromung Fellowship Kohima
16.	April 13th	Kohima Japukong Telungjem Seminar
17.	April 14th	KABA Music Ministry
18.	April 19th – 21st	Believers Fellowship
19.	April 23rd – 25th	Chungtia Laisher telungjem
20.	April 28th	Dibua Fellowship Kohima
21.	May 1st – 5th	Leadership Building Coalition Prog, Kolkatta
22.	May 3rd – 4th	Mao Theological Association
23.	May 6th – 11th	Music Training (Ao Arogotem)
24.	May 22nd	KABA Music Ministry
25.	May 25th – 26th	Dibua Fellowship Kohima
26.	May 28th – 30th	North-East Network (NGO)
27.	June 1st – 2nd	Faith Harvest Church
28.	June 2nd	Tikhir Gazzeted officer Fellowship
29.	June 8th	Prayer committee retreat KABA
30.	June 21st – 23rd	Children Summer Camp KABA
31.	June 28th – 29th	MSTK Youth Revival
32.	July 1st – 6th	Men's Special Camp

S.N	Date	Programmes
33.	July 9th	Lotha Church Kohima
34.	July 10th – 13th	Father Heart Conference
35.	July 13th	CRBC
36.	July 28th	Powerfaith Ministry
37.	July 29th – August 2nd	C.I.S.H.R
38.	August 9th – 12th	Viswema Baptist Church
39.	August 11th – 12th	ABAM
40.	August 14th – 15th	KABA Youth Ministry
41.	August 24th – 25th	UESI Ministry
42.	September 1st	ABAM
43.	September 17th – 18th	NRLM
44.	September 19th – 20th	Ao Argo Revival Follow-up
45.	September 21st	Covenant Baptist Church, Dimapur
46.	Sept 30th – Oct 4th	Thilixu Village Baptist Church
47.	October 5th – 6th	CRBC
48.	October 7th – 8th	Chang Baptist Church Kohima
49.	October 12th	Powercomm
50.	October 12th	Bible Society of India
51.	October 21st – 22nd	Lotha Baptist Church Youth Association
52.	October 21st – 23rd	KABA Youth Ministry
53.	October 23rd	Assam Valley Baptist Mission
54.	October 25th – 27th	E.G.F, Nagaland



# Music ministry Osang



**Ms. Amongbi Jamir**

1. Fellowship choir melentepba sentong 1st September nung liasü. Iba sentong agiba ajanga kiyong balala nung Sentep nung tekülemertem asoshi temoatsü aser ken atener asoshi tangazükba aser ken ajanga tanga fellowship nunga temoatsü lemsatepba mapang liasü.
2. Fellowship Choir kenten Sentong 24th August nung liasü. Iba mapang kanga temoatsü ngua ajaki shilem agia ken kaket nungi tekülem mapang agi. Tongti O jembir, Rev. Arenla Longchari Tsüngrem O bener aruba nung tekülemer ajak ajungshiogo.



3. Arogopur ajak longso-longsoa music celebration 21st September anogo shilem tajung agiogo. Asen KABA nung sempet tajung aika lir aser tarutsü nunga ano yimya balala agi Tsüngrem tushiba nung aser nübür mulung ajungshiba nung shilem tajung maneni agitsü kü sarasadem.
4. Taküm ABRSM practical exam October 3rd aser 4th nung liasü. Examiner Mr. David Spencer-i iba exam Minister's Hill Fellowship nung conduct asü. Iba exam agütsürtem ajak agi students 33 liasü. Iba exam ya asen Arogo nungi dang masü saka Music institution balala nungi arua lir. Practical exam agütsürtem piano, voice, violin, aser classical guitar liasü.
5. Music Makers Club küm ana asoshi Ministers' Hill Sunday School rooms nung every Saturday lia aruogo. Teacher-tem kanga meranga arua lanur tem music sayuogo. Aser aji oda tsüraburia mapang sacrifice süa kiyong talang, inconvenience liaka meina aruogo. Ajak agi nisung 72 ABRSM theory exam agütsüogo. Ajak asoshi tayongba asütsü asoshi 2020 nungibo Main Church Sunday school room nung MMC alitsü.
6. Praise Fountain iba küm sarasadema nübu aniokba mapang lir. Youth Ministry, Associate Pastor den külemei taka amteper iba ya sangküm nungi ano spiritually aser musically renemba mapang alitsü. Aser amanger, tekülem nung ano maneni shilem agitsü.







MR. AREP TZUDIR

## YOUTH MINISTRY OSANG

October 25 nungi tenzüka October 27, 2019 tashi KABA Lanur Unshakeable sentong Tsüngremer maongka nung kanga temoatsü aser tepela nung mungoko. Iba sentong nung Tsüngrem osang abener iDisciple Ministry, Philippines nungi par asem arua liasü. Par asem rongnung Pastor Franco aser Pastor Uziel-i lanurtem den melentepa Tsüngrem O lemsatep aser Mrs. Pauline-i Leadership Training nung yari.

iDisciple ya International tentet ka lir aser parnok nükjidongji Tsüngrem asoshi nütsüng yangluba aser nütsüng rendaktsüba lir. Pastor Franco ya iba tentet Philippines branch Director lir.

Par asem tejangraba aser tangatetba tajung alibayong, parnoki iba sentong nung atentsü asoshi jili-a aru aser KABA Youth Core lenirtem aser lanurtem den Unshakeable sentong mamungdang leadership training aser workshop ayongzüka liasü. Item workshop aser training balala ayongzükba rongnung “Mining God’s Word” ta asüba seminar ka agi. Iba seminar ya anogo ka

tepiyong Laishiba koda jangratema azüngtsü sayu. Iba seminar ajanga KABA Youth Ministry nung lenirtem kanga tajangzük ngudaktsü, kechiaser iba seminar ajanga item lenirtem nem Laishiba azüngtsü asoshi teshisadangtsü tasen agütsü aser tatenertemi Tsüngrem O tali aroka azüngtsü aser jangja bushitsü asoshi tenangzükba agia liasü.

Unshakeable nung lokti sendenba mapang Tsüngrem O jembirtemi Filipi shiti nung amendaker Tsüngrem O lemsa aser iba tadener aikati Tsüngrem den telemtetba tasen agi aser iba tezungzüktep agiba mapang temoatsü ngua liasü. Lanur kari iba sentong nung Tsüngrem den pei taküm tanaben bendanga agütsüa liasü.

Asen Tsüngremi Unshakeable sentong nung KABA lanurtem kanga moatsüogo aser iba ya arogopur sarasadem ajanga ta kuli aser maneni KABA lanurtem asoshi sarasadem nung khuret abentsü mepishir.

### *Ni temoatsü anguba*

### *Imnakumzuk Jamir, Bayavü Fellowship.*

Asen Arogo nung aliba teintet lanurtem (KABA Youth PLUS) asoshi ayongzükba sentong “Converge” October 24, 2019 nung adenba temoatsü aser tangazükba lemsateptsü iba maongka angu nung pelaa iba osang tatsüka zülur.

Iba sentong ya KABA Youth Ministry “Unshakeable” sentong den sendaktepa agi-a liasü. KABA Youth PLUS “Converge” nung Pastor Uziel Idurot shiba One Body Christian Ministries, Manila, Philippines nung Pastor inyaker pai Tsüngrem O jembi aser ayongzüka liasü.

Pai jembiba nungi ni asoshi teshisadangtsü aser temoatsü kar yamai lemsateper:

- a) “Mapa” ta asüba ya meimchir asoshi Tsüngremer atakatem nung shilem ka lir, saka ni aser nai iba “mapa” ta asüba atakatem nung Tsüngrem koda sentsüwangshidaktsür? Asenoki aiben asen “mapa” ajanga Tsüngrem sentsüwangshidaktsütsü melen mapaji asen taküm teyongtsü kümdakja asenok temenen nung tsüker. Asen “mapa” nung Yisu Khrista teyongtsü maküm tashi asenoki asen “mapa” ajanga Tsüngrem sentsüwangshidaktsütsü makok.
- b) Osangtajungji kechi? Osangtajungji Yisu Khrista aser Pa dak amanger anogoshia Pa nutsüng tajung akümba lir. Asenok tamanger shia Yisu Khrista nütsüng akümtsü memerang tashi asen taküm nung Osangtajungji malitsü. Ni aser nai Yisu Khrista nütsüng akümtsü anogoshia koma merangdar?
- c) Yisu Christaji Tsüngremi Pai taochi aser temeim sayua, meimchir temenen nungi alangzüktsü aser kümzüktsü asoshi alimai yok. Iba ya ajaki meteta lir. Saka ni aser nai Yisu Christai asen menen yong kangki nung metadang Tsüngremi pa toktsübaji jenjang odangdar ma? Tsüngremi asenok kümzüktsü asoshi Yisu Khrista alimai yok süra, naia temenen nung alir ka kümzüktsü aser alangzüktsü asoshi nai ne ajaso chir bendanga agütsütsü mulungtetdi ma?

Ni asoshi item tasüngdangba aser teshisadangtsü onüktem ajanga ni tanelanung kanga temoatsü ngualiasü, kechiaser ni Yisu Khrista nütsüng akümctsü merangdang lulaa doker. Ni Osangtajungji metet saka iba Osangtajung ataloktsü asoshi Tsüngrem koda temulung raksar alitsü aji mebilemdang. Ni Pa tenzüker ka ama kütenzükba wadang aser mapanung Yisu lir ma?

Tatem nung, Osangtajungji “ni kümzükogo” ta asüba kisüngji masü saka na kümzüka aliba nung tepelaji lir (Gospel isn’t just about “being saved” but enjoying).



2019 Unshakeable Speakers  
Pastor Franco, Mrs. Pauline & Pastor Uziel



Word Aroma



Mining God's word KABA Youth Core Leaders

# *Christian* *Education* **Ministry** **Osang**

## 1. Pelar

*Pastor, Nagnimora*

Tamasa Nagnimora Ao Baptist Arogo ajanga KABA Children Ministry aser yangi aliba amangbapur ajak dangi Tsüngrem temeim salem abener, aser nenoki (Children Ministry) ozü Arogo asoshi mapa tajung inyakba mamadokteti tepela kar yamai lemsateper.

1980 küm ozu Arogoi sarasadema S.S class ya tenzük. Oda bendang lima Arogo tila ka, nütsüng nübu permanent settle mesüi oli aruli ta melentepa aliba arogo. Anungi S.S tanurtem züngsemjia küm shia melenshia arur, küm kar renloker, küm kar ajema akümer. Saka Tsüngrem taochi aser teyari ajanga tanü tashi S.S class takümlia arudaki.

Yamaji küm aika arudang tanga loktitem nungi aser kija kibong balala nungi teyari angubatem lir, saka item rongnung kanga tongtibang aser kanga nüngdaka aliba mapa tajung kar.

*KABA Children Ministry ajanga inyakbatem:*

- \*2018 küm S.S class room ana (2) nung sentsü tajung tepjaa, table, chair aser white board stand teperi yanglutsu.
- \* 2019, 2nd Feb: Nagnimora town Aregotem nungi S.S tesayurtem anitena asen Arogo nung training tajung agütsü
- \* 2019, 3rd Feb: Arogo tenzüker aser tenzükla orientation sentong tajung agütsü.
- \* 2019 küm asoshi S.S tanurtem “Mapatong kaket” peria agütsü.

## **2. Longwa nung Tsüngdong Tenyaba mapa**

Arogo Mission Board ajanga nungloksüba ama Oct 3-7, 2019 Longwa nung tsüngtong tenyaba mapa inyaka liasü. Onok ajak agi nisung 9 ao.

- Longwa yim ya Konyak lima nung tanabuba tulutiba yim lir. Yangji kibong 600 dak tema. Netsüng yongsük aika dang kechiyong parnok joint family alir asünung ki ka nunga nisung 70 shi ah alir ta ashi.
- Angh tanubur ka, tetsür ana agia lir aser iba angh senmangerji küm ana majung tanur ka lir.
- Arogo ka dang. Aonung anungdang kecha mesadangi ajak kanga dang longsoa teburtem, tetsürtem aser lanurtem arua liasü.
- 2019 CE Ministry Mission tenla ajanga Nagnimora Ao Arogo yaria liasü.



Onoki inyakba mapa kar:

1. Honibar aser deobar tekülem sentep agitsü maongka angu.
2. Deobar sentep temli Family seminar ka aka. Kibong akümertem ajak ata-a liang ta ashi nung parnok aika dang ataa iba seminar nung tena liasü.
3. Iba yimtsüngi tesangwa bener arur ano küm asemshi dang. Aser yangji light yanglu ashir tebur ka dang lir. Onoki tesem balala ana nung takdang ka nung light koda mesangtsü, switch box koda yanglutsü aser socket ka koda yanglutsü mapa agi inyaka angazükdaktsü. Iba tangazükba junga angazüker parnok ajak agi 25 liasü. Parnok kari ashiba agi ‘tangbo light kodang raksatsü ta ataa alir’ ta shia liasü.
4. Medical team ajanga honibar anogo Anghbar kima shirangertem yaria liasü. Shi temang nung timtema alir jenti dang liasü. Parnok ajak agi 70 dak tema yaria liasü. Aser onok tanendakia metitemi arurtema maneni yaria liasü.
5. Shalom Christian school ya Nehemiah trust ajanga class A-6 tashi lapoka lir. Yangji azünger ajak free azünger. Longwa aser temeket yimtsüngtem nungi aser Burma nungi arua tanurtem azünger. Hostel nung Burma nungi adoker 50 tezungdak free dang züngdaktsür.
  - Iba camp nung tanurtem 178 tena liasü. Camp omen ‘Special to God’ nung ajemdaker tanur telok asem lemsar tapet otsü, activities, teka mapa, asayaba aser ken balala aser pei temang koda merüka ayutsü aser yimya tajung benshitsü sayua liasü.
  - Hostel nung tanurtem den anep awa special sentong ka candle light service agia bendanga agütsüba mapang ka aka. Tanurtem kanga dang techira, tejangra aser Tsüngrem tenzüktsü jangrabapur jenti dang liasü.



Arogopur sarasadem ajanga takokba tulu nung sentongtem agia liasü. Kanga dang pelar. Parnok taküm den asenok taküm ya medemdangra, asenokbo kotak nung alir ama ta bilema liasü. Longwa nungi par nüber anitetsü tangatetba lanur jenti adokdakjang ta maneni sarasademsüdi. Asen Aor jala jabaso parnok 6 tashi tesem balala nung par nisungtem den mapa inyaker ajurua liasü, parnok asoshir maneni sarasademsüdi.



### **3. ABAM Sunday School Object Lesson Sentong Mr. Tiatoshi & Merenyanger**

Tamasa ajak dangi Yisu temeim salem abener. ABAM-i Sunday School Object Lesson , Omen: “ Sobaliba Yayim Nükla nung Sunday School Lesson.” 27th-29th September 2019, Impur nung ayongzüka liasü. KABA nungi Associate Pastor Christian Education-i anir tesayur asem iba sentong nung aten. Iba sentong nung lim Arago 130 dak tali nungi nisung 450 shi arua dena liasu. Omen nung agüja aliba ama iba sentongtem nung sobaliba inyakyim tajung balala kodasür Sunday School lesson aser Khristan lokti ka nung amshitsü taroktiba nung rateta sayua liasü.

Iba sentong nung okila Mr. C. Apok Jamir, ABAM Education and Literature Secretary-i agütsü. Prof. L. Imsütoshi (Clark theological College)-i sobaliba aser Khristan tesayuba nung ajemdaker jembia liasü. Miss Alemren, ISSU Coonoor-i Sunday school Tesayur temi tanurtem sempet balala ali nung parnok angateta tasa balala nung sayutsü aser anishitsu sayu.

Arogo balala nungi object lesson saya , onük balala nung kanga dang junga sayu.

“Sobaliba ya Sunday School asoshi tongtibang Nükmen” nung ajemdaker olangtep agia liasü.

Onok taortem ajak temoatsu ngua dener aruba tepela osang lemsateper. Iba maongka tulu asoshi Tsüngrem tenüng asanger.



# AROGOTSÜR OSANG

APRIL – NOVEMBER 2019



Rev. Yashila Jamir

1. Tenzüklatem ajak 1st June 6 am- 8 am Main Church nung lumia sarasadem mapang agia liasü
2. Sanctuary Flower Club (SFC) member-tem küm tepiyong deobar anogotem aser special anogotem nung Tenla ki naro achayanga arur. Parnok atema 13th July nü training ka Main Church nung agütsü. Iba sentong nung resource person Mr. Longsenti aser Mrs. Asenla Akang-i “Flower arrangement in the Church” onük nung ajemdaker theory aser practical tesayuba tajung agütsü.
3. June 16 nü Women Ministry-i achayanga Father’s Day sentong tajung yanglua Main Church nung kanga temoatsü ngua agia liasü.

4. 2019 küma tetsürtem nem Laishiba nungi ainkar Kakettém January-July tashi azüngtsü mapang lapoktsü. Tetsür ajak agi 53-i züngma aser parnok ajak nem certificate den sempet agütsü. Züngmartemi August 2nd Thursday pei pei kiyong fellowship nung sentep bendanga agia liasü.

5. 2019 küm Tetsür Holistic Ministry pezüben (4 times) takok tulu ngua agiogo. Outside KABA anaben- Silonijan Union Baptist Church February 28- March 3, 2019 aser Chuchuyimlang Baptist Arogo September 10-12, 2019 agia liasü. KABA kübok Town aser Chandmari Fellowship nung kasa sentong August 20, 21 & 23 Main Church nung agi. Ano Mehulietsa Fellowship nung iba sentong October 15 - 16 & 18 agia liasü.

KABA Women Department Holistic Ministry ya Khristan taküm aser kibong tajungba nung sasü-anema alitsü ta angateta benshitsü tesayuba tongtibang subjects kar agiteta sayur. Item subject-temji:

1. Tetsür temang anema aliba (Women's Health)
2. Menüngdakba osettsüset agi nüngdak oset küma yangluba (Mother's Craft)
3. Ki aser kibong tiptema ayuba. (House Keeping)
4. Sasü anema kibong rongsen ketdangsüba (Home Economy)
5. Christian Education
6. Cooking & Baking
7. Bible Study



## Unshakeable 2019



ABAM Zone 8  
Aoli Asüngsashi Follow-up Sentong





*Tepela  
Khriftmas  
Aser  
Küm Tasen  
Salem*

Kohima Ao Baptist Arogo  
ajanga amangbapur ajak dangi abener

# KABA MAPANGSER



**WORDWIDE EVANGELIZATION FOR CHRIST (WEC) TELOK DEN  
DEACON ASER MISSION BOARD**

